

Na osnovu člana 16. stav (4) Zakona o Vladi Zeničko-dobojskog kantona – Prečišćeni tekst („Službene novine Zeničko-dobojskog kantona“, broj: 7/10 i 3/23), na prijedlog Ministarstva za boračka pitanja, Vlada Zeničko-dobojskog kantona, na 61. sjednici, održanoj dana 13.12.2024. godine, d o n o s i

ZAKLJUČAK

I.

Utvrđuje se Prijedlog Odluke o proširenom obimu prava iz oblasti zdravstvene zaštite za branioce i članove njihovih porodica.

II.


Prijedlog Odluke iz tačke I. ovog Zaključka upućuje se u dalju skupštinsku proceduru.

III.

Zaključak stupa na snagu danom donošenja.

Broj: 02- 02- 20651 /24
Datum, 13.12.2024. godine
Zenica

DOSTAVLJENO:
1x Ministarstvo za boračka pitanja,
1x Stručna služba Skupštine,
1x a/a.



PREMIJER

Nezir Pivić

Na osnovu člana 37. stav 1. tačka f) Ustava Zeničko-dobojskog kantona i člana 7. stav (2) Zakona o dopunskim pravima branilaca i članova njihovih porodica ("Službene novine Zeničko-dobojskog kantona", broj: 15/24) Skupština Zeničko-dobojskog kantona na _ sjednici održanoj __. __. 2024. godine d o n o s i

ODLUKU

O PROŠIRENOM OBIMU PRAVA IZ OBLASTI ZDRAVSTVENE ZAŠTITE ZA BRANIOCE I ČLANOVE NJIHOVIH PORODICA

DIO PRVI - OPĆE ODREDBE

Član 1.

(Predmet Odluke)

Ovom Odlukom utvrđuje se prošireni obim prava iz oblasti zdravstvene zaštite, uslovi, način i postupak za ostvarivanje istih za branioce i članove njihovih porodica koji imaju prebivalište na području Zeničko-dobojskog kantona (u daljem tekstu: Kanton), kao i povratnika u entitet Republiku Srpsku koji ostvaruju osnovna prava iz branilačko-invalidske zaštite u gradovima/općinama Kantona ili koji su na evidenciji nadležnog organa za vojne evidencije u gradovima/općinama Kantona.

Član 2.

(Korisnici prava)

(1) Korisnik prava je:

- a) dobitnik ratnog priznanja ili odlikovanja, za prava iz člana 6. tačka a) i c) ove Odluke;
- b) ratni vojni invalid za prava iz člana 6. tačka a), b) i c) ove Odluke;
- c) demobilizirani branilac koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca, odnosno najmanje 12 mjeseci ukoliko je nezaposlen ili je u Oružane snage pristupio kao maloljetno lice ili šest mjeseci po punoljetstvu za prava iz člana 6. tačka a) i c) ove Odluke;
- d) član porodice šehida, poginulih, umrlih i nestalih branilaca- korisnik porodične invalidnine za prava iz člana 6. tačka a) i c) ove Odluke;
- e) član porodice umrlog dobitnika ratnog priznanja i odlikovanja- korisnik mjesečnog novčanog dodatka za prava iz člana 6. tačka a) i c) ove Odluke;
- f) član porodice umrlog ratnog vojnog invalida-korisnik porodične invalidnine za prava iz člana 6. tačka a) i c) ove Odluke;
- g) član porodice umrlog demobiliziranog branioca koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno najmanje 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu- supružnik koji nije zasnovao bračnu ili vanbračnu zajednicu i dijete dok je na redovnom školovanju za prava iz člana 6. tačka c) ove Odluke i
- h) član porodice umrlog demobiliziranog branioca koji je u periodu od 06.04.1992. do 23.12.1995. godine u sastavu Oružanih snaga proveo najmanje 12 mjeseci - supružnik koji nije zasnovao bračnu ili vanbračnu zajednicu i dijete dok je na redovnom školovanju za prava iz člana 6. tačka a) ove Odluke.

(2) Prava po ovoj Odluci mogu koristiti lica iz stava (1) ovog člana pod uslovom da imaju prebivalište na području Kantona u trajanju od najmanje 24 mjeseca neprekidno do dana podnošenja zahtjeva, osim povratnika u entitet Republiku Srpsku.

Član 3. **(Posebni korisnici)**

Prava može koristiti i:

- a) dijete šehida, poginulog, umrlog i nestalog branioca nakon prestanka prava na porodičnu invalidninu i dijete poginulog, umrlog i nestalog dobitnika ratnog priznanja ili odlikovanja, kojem je prestalo pravo na mjesečni novčani dodatak, za prava iz člana 6. tačka a) i c) ove Odluke;
- b) dijete umrlog ratnog vojnog invalida do navršene 35 godine života, za prava iz člana 6. tačka a) i c) ove Odluke;
- c) dijete umrlog demobiliziranog branioca, koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu, do navršenih 35 godina života, za prava iz člana 6. tačka a) i c) ove Odluke;
- d) dijete umrlog demobiliziranog branioca, koji je u periodu od 06.04.1992. do 23.12.1995. godine u sastavu Oružanih snaga proveo najmanje 12 mjeseci do navršenih 35 godina života, za prava iz člana 6. tačka a) ove Odluke;
- e) dijete dobitnika ratnog priznanja ili odlikovanja, do navršenih 30 godina života, za prava iz člana 6. tačka a) i c) ove Odluke;
- f) dijete ratnog vojnog invalida do navršenih 30 godina života za prava iz člana 6. tačka a) i c) ove Odluke;
- g) dijete demobiliziranog branioca, koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu, do navršenih 30 godina života, za prava iz člana 6. tačka a) i c) ove Odluke;
- h) dijete demobiliziranog branioca, koji je u periodu od 06.04.1992. do 23.12.1995. godine u sastavu Oružanih snaga proveo najmanje 12 mjeseci do navršenih 30 godina života, za prava iz člana 6. tačka a) ove Odluke;
- i) roditelj umrlog dobitnika ratnog priznanja ili odlikovanja, umrlog ratnog vojnog invalida i umrlog demobiliziranog branioca, koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca, odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu, a koji je sa istim živio u zajedničkom domaćinstvu, za prava iz člana 6. tačka c) ove Odluke i
- j) roditelj koji živi u zajedničkom domaćinstvu sa dobitnikom ratnog priznanja ili odlikovanja, ratnim vojnim invalidom i demobiliziranim braniocem, koji je u periodu od 06.04.1992. do 23.12.1995. godine u sastavu Oružanih snaga proveo najmanje 24 mjeseca odnosno 12 mjeseci, ukoliko je u Oružane snage pristupio kao maloljetno lice ili šest mjeseci po punoljetstvu, za prava iz člana 6. tačka c) ove Odluke.

Član 4. **(Dokazivanje statusa)**

U postupku ostvarivanja prava po ovoj Odluci, branioci i članovi njihovih porodica svoj status dokazuju rješenjem nadležne gradske/općinske službe o priznavanju svojstva dobitnika ratnog priznanja i odlikovanja i ratnog vojnog invalida, odnosno člana porodice šehida, poginulog, umrlog, nestalog branioca i člana uže porodice poginulog, umrlog ili nestalog dobitnika ratnog priznanja i odlikovanja, ili uvjerenjem nadležnog organa izdatog u skladu sa Zakonom o upravnom postupku ("Službene novine FBiH" broj 2/98, 48/99 i 61/22), a demobilizirani braniocu

uvjerenjem VFMB-3a izdatog od strane nadležne Grupe za pitanja evidencija iz oblasti vojne obaveze.

Član 5.

(Obrasci zahtjeva za ostvarivanje prava)

Zahtjev za ostvarivanje prava podnosi se na obrascima koje propisuje ministar Ministarstva za boračka pitanja (u daljnjem tekstu: Ministarstvo), u roku od sedam dana od dana stupanja na snagu ove Odluke.

DIO DRUGI - PRAVA

Član 6.

(Prava po Odluci)

Prošireni obim prava iz zdravstvene zaštite odnosi se na:

- a) zdravstveno osiguranje;
- b) nabavku ortopedskih i drugih pomagala i njihovu popravku za ratne vojne invalide i
- c) liječenje i nabavku lijekova.

POGLAVLJE I. ZDRAVSTVENO OSIGURANJE

Član 7.

(Obračun doprinosa)

- (1) Lica koja pravo na zdravstveno osiguranje ne mogu ostvariti po propisima iz oblasti zdravstva, po osnovu radnog odnosa, nezaposlenosti, po osnovu prava iz penzijsko-invalidskog osiguranja ili po drugom osnovu, pravo na zdravstveno osiguranje ostvaruju po osnovu ove Odluke.
- (2) Izuzetno, pravo na zdravstveno osiguranje po ovoj Odluci može ostvariti i lice koje po osnovu postojećeg zdravstvenog osiguranja u Republici Hrvatskoj ne može ostvariti pravo na zdravstvenu zaštitu u mjestu prebivališta na području Kantona.
- (3) Sredstava za realizaciju prava iz stava (1) i (2) ovog člana osiguravaju se u Budžetu Zeničko-dobojskog kantona, na budžetskoj poziciji Ministarstva.
- (4) Visina stope doprinosa za zdravstveno osiguranje korisnika zdravstvene zaštite utvrđena je Odlukom o osnovicama i stopama doprinosa za obavezno zdravstveno osiguranje u Zeničko-dobojskom kantonu („Službene novine Zeničko-dobojskog kantona“ broj: 12/13 i 14/13), a obračun vrši Zavod zdravstvenog osiguranja Zeničko-dobojskog kantona.
- (5) Na osnovu obračuna iz stava (4) ovog člana Ministarstvo kvartalno predlaže Vladi Zeničko-dobojskog kantona donošenje zaključka o odobravanju sredstava po navedenom osnovu.

Član 8.

(Podnošenje zahtjeva i donošenje rješenja)

- (1) Zahtjev za priznavanje prava na zdravstveno osiguranje za sebe i članove svoje porodice, branilac i član porodice podnosi gradskoj/općinskoj službi (u daljnjem tekstu: gradska/općinska služba) nadležnoj za poslove branilačko-invalidske zaštite prema mjestu prebivališta podnosioca zahtjeva, odnosno području u kojem ostvaruje prava iz branilačko-invalidske zaštite ili je na evidenciji nadležnog organa za vojne evidencije.
- (2) Uz zahtjev iz stava (1) ovog člana koji mora biti obrazložen, podnosilac zahtjeva prilaže u originalu ili ovjerenj kopiji sljedeću dokumentaciju:

- a) dokaz o statusu branioca i člana njegove porodice;
 - b) uvjerenje o kretanju kao dokaz o prebivalištu;
 - c) uvjerenje Porezne uprave da se ne vode u jedinstvenom sistemu uplate doprinosa za zdravstveno osiguranje, kao dokaz o nemogućnosti ostvarivanja ovog prava za podnosioca zahtjeva i punoljetne članove zajedničkog domaćinstva;
 - d) izjava o zajedničkom domaćinstvu – kućna lista;
 - e) uvjerenje o bračnom stanju ukoliko je podnosilac zahtjeva supružnik umrlog demobiliziranog branioca ili demobilizirani branilac koji nema drugih članova domaćinstva i
 - f) drugi dokazi iz kojih se može utvrditi osnovanost zahtjeva.
- (3) Gradska/općinska služba kojoj je podnesen obrazloženi zahtjev sa potrebnom dokumentacijom za priznavanje prava na zdravstveno osiguranje dužna je u roku od sedam dana dostaviti Ministarstvu prijedlog o odbijanju ili priznavanju prava na zdravstveno osiguranje.
 - (4) Na osnovu primljene obavijesti Ministarstva o saglasnosti ili odbijanju dostavljenog prijedloga, gradska/općinska služba donosi rješenje o priznavanju prava ili odbijanju zahtjeva za zdravstveno osiguranje.
 - (5) Pravo na zdravstveno osiguranje priznaje se od dana podnošenja zahtjeva.
 - (6) Doneseno rješenje gradska/općinska služba dostavlja Ministarstvu i podnosiocu zahtjeva.
 - (7) O žalbi na rješenje gradske/općinske rješava Ministarstvo.

Član 9.

(Prijavljivanje korisnika i izdavanje zdravstvene knjižice)

Prijavu u jedinstveni sistem registracije prijava/odjava osiguranih lica u određenim okolnostima - Obrazac JS 3120 za zdravstveno osiguranje lica kojem je rješenjem priznato pravo na zdravstveno osiguranje na osnovu ove Odluke, popunjava gradska/općinska služba i istu dostavlja Poreznoj upravi FBiH, nadležnoj poreznoj ispostavi, te izdaje zdravstvenu legitimaciju, koju korisnik zdravstvene zaštite ovjerava u Zavodu zdravstvenog osiguranja Zeničko-dobojskog kantona (u daljnjem tekstu: Zavod).

Član 10.

(Odjava korisnika zdravstvene zaštite)

- (1) Kada se iz bilo kojeg razloga steknu uslovi za prestanak prava na korištenje zdravstvene zaštite gradska/općinska služba donosi rješenje o prestanku prava na zdravstveno osiguranje, te dostavlja odjavu osiguranja nadležnoj poreznoj ispostavi i Ministarstvu u roku od sedam dana od dana saznanja za promjenjene okolnosti koje su od uticaja za prestanak, odnosno daljnje korištenje prava.
- (2) Korisnik prava je dužan u roku od 15 dana prijaviti svaku promjenu koja utiče na izmjenu ili prestanak prava na zdravstveno osiguranje.

Član 11.

(Revizija i dostavljanje izvještaja)

- (1) Gradska/općinska služba je dužna vršiti redovnu mjesečnu reviziju ostvarivanja prava na zdravstveno osiguranje korisnika prava.
- (2) Izvještaj o izvršenoj reviziji iz stava (1) ovog člana sa podacima o broju korisnika zdravstvene zaštite i broju objavljenih lica gradska/općinska služba dostavlja Ministarstvu najdalje do petog u mjesecu za prethodni mjesec.
- (3) Ukoliko gradska/općinska služba ne dostavi izvještaj o izvršenoj reviziji sa podacima i u roku iz stava (2) ovog člana, Ministarstvo će naložiti postupak odjave korisnika prava.

- (4) Korisnik prava na zdravstveno osiguranje, obavezan je u periodu od 01.01. do 31.01. tekuće budžetske godine gradskoj/općinskoj službi dostaviti ažuriranu dokumentaciju iz člana 8. stav (2) ove Odluke, a u svrhu nastavka korištenja priznatog prava.
- (5) U slučaju da korisnik prava ne dostavi dokumentaciju u roku iz stava (4) ovog člana, gradska/općinska služba će odmah donijeti rješenje o prestanku prava sa 31.01. tekuće godine i primjerak istog je obavezna dostaviti Ministarstvu.

POGLAVLJE II. NABAVKA ORTOPEDSKIH I DRUGIH POMAGALA I NJIHOVA OPRAVKA

Član 12. (Sadržina prava)

Ratni vojni invalid, u skladu sa važećim zakonskim propisima, ostvaruje pravo na novčanu pomoć za:

- a) finansiranje odgovarajućih proteza i drugih ortopedskih pomagala, ukoliko iste ne može ostvariti po osnovu zdravstvenog osiguranja, preporučenih od strane nadležnog ljekara (za profesionalno ili radno angažovane, aktivne sportiste i slučajeve izmijenjenog zdravstvenog stanja) i odobrene od strane stručne komisije u vremenu znavljanja ortopedskog pomagala ili u bilo koje vrijeme kad je to medicinski nužno;
- b) ugradnju modulskih sklopova u standardne proteze kod visokih i dvostrukih amputacija donjih ekstremiteta;
- c) sufinansiranje ortopedskih pomagala koji se obezbjeđuju putem Zavoda, do visine pune nabavne cijene, koja se određuje na osnovu ispitivanja tržišta ovlaštenih ortopedskih kuća, i to:
- 1) invalidskih kolica sa sljedećim karakteristikama: težine do 10 kg, sklopiva i preklopiva, pogodna za lakše savladavanje arhitektonskih barijera, sa dobrom i jednostavnom mogućnošću manevrisanja, pogodna za samostalno unošenje u automobil i sl.;
 - 2) elektromotornih kolica u posebnim slučajevima kada postoji medicinska nužnost nabavke istih, na svakih sedam godina;
 - 3) antidekubitalnih jastuka sa sljedećim karakteristikama: da dimenzijama odgovaraju veličini kolica, da imaju dovoljan broj ventila za puhanje čime se omogućava željeni balans u pojedinim dijelovima jastuka, da kvalitetom sprječavaju nastanak dekubitusa i dr.;
 - 4) antidekubitalnih madraca koji kvalitetom sprečavaju nastanak dekubitusa i doprinose što bržem zarastanju postojećih rana;
- d) tiflotehnička pomagala za slijepe i slabovidne RVI: bijeli štap, naočale, slušni aparat i dr.;
- e) finansiranje servisiranja, popravke i rezervnih dijelova za ortopedska pomagala u punom iznosu, nakon isteka garantnog roka i materijala koji omogućavaju korištenje ortopedskog pomagala;
- f) sufinansiranje dogradnje proteza donjeg i gornjeg ekstremiteta i očnih proteza kad to nije medicinski nužno u vrijeme znavljanja ortopedskog pomagala, u iznosu koji se utvrđuje odlukom ministra za svaku budžetsku godinu, a koji ne može biti manji od 30% cijene koštanja ortopedskog pomagala utvrđene aktima Zavoda, ukoliko Zavod ne pokriva punu cijenu koštanja nabavljenog pomagala.

Član 13. (Podnošenje zahtjeva)

Zahtjev za novčanu pomoć za nabavku i popravak/servisiranje ortopedskog i drugog pomagala, ratni vojni invalid podnosi gradskoj/općinskoj službi.

Član 14.
(Potrebna dokumentacija)

Uz zahtjev za nabavku odnosno popravak/servisiranje ortopedskog i drugog pomagala, podnosilac zahtjeva obavezno prilaže u originalu ili ovjerenoj kopiji sljedeću dokumentaciju:

- a) rješenje o priznavanju prava na ličnu invalidninu;
- b) uvjerenje o kretanju (kao dokaz o prebivalištu);
- c) odgovarajući medicinski nalaz sa prijedlogom;
- d) potvrdu nadležnog ljekara specijaliste o potrebi ortopedskog i drugog pomagala, ovjerenu od strane Zavoda, sa iskazanim ličnim učešćem ili 100% plaćanjem i
- e) originalni predračun, odnosno račun koštanja nabavke ili popravke/servisiranja ortopedskog i drugog pomagala (original račun je obavezan u slučaju odobravanja sredstava za nabavku ortopedskog pomagala u skladu sa članom 12. tačka e) i f) ove Odluke).

Član 15.
(Posebni slučajevi)

- (1) U slučajevima kada je podnosiocu zahtjeva potrebno novo ortopedsko ili drugo pomagalo ili popravak/servisiranje pomagala koje koristi, a ukoliko se nabavka ne može ostvariti na teret sredstava Zavoda, isti je dužan pribaviti prijedlog ljekara specijaliste odnosno zdravstvene ustanove u kojoj ostvaruje primarnu zdravstvenu zaštitu, za nabavku novog odnosno popravku/servisiranje postojećeg ortopedskog ili drugog pomagala.
- (2) Prijedlog ljekara iz stava (1) ovog člana se izdaje nakon izvršenog neposrednog uvida u zdravstveni karton korisnika prava i upoznavanja sa podacima o ranijem liječenju, a isti mora biti obrazložen i sadržavati podatke o vrsti i tipu ortopedskog ili drugog pomagala, odnosno popravci/servisiranju.
- (3) Pored medicinske dokumentacije iz koje se može utvrditi dijagnoza bolesti i način liječenja korisnika prava (otpusnice iz ustanova gdje je obavljeno stacionarno liječenje, nalaza ljekara specijalista hirurgije, ortopeda, traumatologa, neurohirurga, neuropsihijatra i sl.), obavezna je kontrola i pregled kod nadležnog specijaliste ortopeda, čiji nalazi ne smiju biti stariji od 30 dana.
- (4) Nalaz specijaliste ortopeda mora ukazivati na neophodnost nabavke ortopedskog ili drugog pomagala, određene vrste, tipa i modela, odnosno popravke/servisiranja.

Član 16.
(Prijedlog gradske/općinske službe)

U roku od sedam dana po prijemu zahtjeva gradska/općinska služba utvrđuje prijedlog za nabavku odnosno popravak/servisiranje ortopedskog i drugog pomagala (u daljnjem tekstu: prijedlog gradske/općinske službe), koji uz kompletnu dokumentaciju podnosioca zahtjeva dostavlja Ministarstvu na daljnji postupak.

Član 17.
(Komisija)

- (1) Nakon stručne obrade prijedloga gradske/općinske službe od strane službenika Ministarstva nadležnog za poslove nabavke ortopedskih i drugih pomagala, isti se sa kompletnom dokumentacijom prosljeđuje Komisiji koja vrši vještačenje zahtjeva (u daljnjem tekstu: Komisija), koju svojim rješenjem imenuje ministar Ministarstva.
- (2) Komisiju čine dva ljekara specijalista ortopeda i službenik Ministarstva iz stava (1) ovog člana, koji je ujedno i sekretar Komisije.

- (3) Posebnim rješenjem ministra Ministarstva utvrđuje se naknada za rad članova Komisije, izuzev za sekretara Komisije.
- (4) Sjednice Komisije, u dogovoru sa ostalim članovima, zakazuje sekretar Komisije.
- (5) Sjednice se održavaju po potrebi, a o radu Komisije vodi se zapisnik.

Član 18.
(Rad Komisije)

- (1) Komisija vrši vještačenje po svakom zahtjevu pojedinačno.
- (2) U slučaju potrebe, Komisija poziva podnosioca zahtjeva na pregled, a može zatražiti i druga medicinska ispitivanja.
- (3) U nalazu i mišljenju Komisije se navodi broj i datum održavanja sjednice, da li je potrebna nabavka ortopedskog ili drugog pomagala i kojeg modela i razlog za slučaj nemogućnosti odobravanja ili popravke/servisiranja ortopedskog i drugog pomagala .
- (4) Na osnovu nalaza i mišljenja iz stava (3) ovog člana, Komisija upućuje prijedlog ministru Ministarstva za odbijanje zahtjeva ili odobravanje sredstava za nabavku, odnosno popravak/servisiranje ortopedskog i drugog pomagala.

Član 19.
(Obavijest Ministarstva i izdavanje rješenja)

- (1) Na prijedlog Komisije i u skladu sa kriterijima utvrđenim ovom Odlukom, ministar Ministarstva donosi obavijest o odobravanju ili odbijanju zahtjeva za pomoć za nabavku, odnosno popravak/servisiranje ortopedskog i drugog pomagala, po podnesenim pojedinačnim zahtjevima koji ne prelaze iznos od 5.000,00 KM.
- (2) Na obrazloženi prijedlog ministra Ministarstva, zaključak o dodjeli sredstava u iznosu većem od 5.000,00 KM donosi Vlada Kantona
- (3) Ministarstvo dostavlja gradskoj/općinskoj službi obavijest o stavu po zaprimljenim prijedlozima, uz povrat kompletne dokumentacije.
- (4) Na osnovu dostavljene obavijesti Ministarstva, gradska/općinska služba donosi rješenje o odobravanju sredstava, odbijanju ili odbacivanju zahtjeva.
- (5) Uplata odobrene novčane pomoći za nabavku, odnosno popravak/servisiranje ortopedskih i drugih pomagala se vrši na račun gradske/općinske službe, koja vrši isplatu odobrenih sredstava na račun prodavca, odnosno korisnika koji dostavi dokaz o uplati sredstava.
- (6) Gradska/općinska služba je dužna u roku od 15 dana po realizaciji pomoći dostaviti Ministarstvu pravdanje utrošenih sredstava.
- (7) O žalbi na rješenje gradske/općinske službe rješava Ministarstvo.

Član 20.
(Ponovni zahtjev)

Podnosioc zahtjeva kojem nije odobrena nabavka ortopedskog ili drugog pomagala, može podnijeti novi zahtjev nakon isteka roka od šest mjeseci od dana konačnosti rješenja o odbijanju ili odbacivanju prethodnog zahtjeva.

POGLAVLJE III. LIJEČENJE I NABAVKA LIJEKOVA

Član 21.

(Liječenje i nabavka lijekova branilaca i članova njihovih porodica)

- (1) Pravo na novčanu pomoć u svrhu naknade troškova liječenja i nabavke lijekova mogu ostvariti lica iz člana 2. ove Odluke za slučaj svoje bolesti ili bolesti člana porodice, kao i lica iz člana 3. ove Odluke samo za slučaj svoje bolesti.
- (2) Pod članom porodice iz stava (1) ovog člana podrazumijevaju se: supružnici, njihova djeca dok su na redovnom školovanju i roditelji koji žive u zajedničkom domaćinstvu sa podnosiocem zahtjeva.

Član 22.

(Ortopedska pomagala)

Novčana pomoć se može dodijeliti u svrhu troškova liječenja i za ortopedska i druga pomagala, a što će komisija iz člana 28. stav (2) ove Odluke cijiniti po svakom pojedinačnom zahtjevu.

Član 23.

(Posebni uslovi)

Novčanu pomoć za ostvarivanje prava iz člana 21. ove Odluke, podnosioci zahtjeva mogu ostvariti pod uslovom da:

- a) postoje evidentni troškovi liječenja i kupovine ordiniranih lijekova;
- b) da u toku tekuće godine nisu primili ovaj oblik pomoći za liječenje istog oboljenja, osim u slučajevima oboljenja iz člana 29. stav (2) ove Odluke.

Član 24.

(Potrebna dokumentacija)

- (1) Zahtjev za odobravanje pomoći za liječenje i nabavku lijekova lica iz člana 2. i 3. ove Odluke podnosi se gradskoj/općinskoj službi, a uz isti se prilaže slijedeća dokumentacija u originalu ili ovjerenoj kopiji:
 - a) dokaz o statusu branioca i člana njegove porodice;
 - b) uvjerenje o kretanju kao dokaz o prebivalištu;
 - c) dokaz o prihodima članova domaćinstva (primanja po osnovu radnog odnosa, a za nezaposlene članove domaćinstva uvjerenje nadležne Poreske ispostave o statusu osiguranika, odnosno da se isti ne vodi u jedinstvenom sistemu uplate doprinosa i dr.);
 - d) izjava o zajedničkom domaćinstvu (kućna lista);
 - e) medicinska dokumentacija iz prethodne i tekuće godine i drugi dokazi iz kojih se mogu utvrditi troškovi liječenja i kupovine ordiniranih lijekova (nalaz ljekara sa utvrđenom dijagnozom i terapijom) sa priloženim računima o troškovima liječenja i kupovini ordiniranih lijekova;
 - f) dokument (potvrda, rješenje) izdat od strane Zavoda o participaciji u troškovima liječenja i nabavke lijekova koji nisu na esencijalnoj listi, ukoliko je riječ o kupovini lijekova koji se ne propisuju i izdaju na teret sredstava obaveznog zdravstvenog osiguranja;
 - g) potvrdu nadležnog ljekara specijaliste o potrebi ortopedskog i drugog pomagala, ovjerenu od strane Zavoda, sa iskazanim ličnim učešćem ili 100% plaćanjem – u slučajevima podnošenja zahtjeva u skladu sa članom 22. ove Odluke;
 - h) odluku Komisije Zavoda o odobravanju liječenja van Kantona, ukoliko se zahtjev odnosi na liječenje van Kantona;
 - i) ukoliko se pomoć traži za liječenje u inostranstvu potrebno je priložiti potvrdu (nalaz) konzilija ljekara specijaliste nekog od kliničkih centara da liječenje nije moguće obaviti u

BiH. potpisanu od strane tri klinička doktora i šefa klinike. potvrdu da liječenja navedene bolesti ne spada u oboljenja koja se liječe na teret Fonda solidarnosti FBiH, te potvrdu Zavoda o učešću u troškovima liječenja i kupovine lijekova na teret sredstava Zavoda, kao i predračun/račun o troškovima liječenja i kupovine lijekova i

j) druge dokaze iz kojih se može utvrditi opravdanost zahtjeva.

(2) Prihod u smislu stava (1) tačka c) ovog člana čine primanja koje članovi domaćinstva ostvaruju po osnovu plaća i drugih primanja iz radnog odnosa, starosne, invalidske i porodične penzije, privredne, uslužne i druge djelatnosti i dopunskog rada, osim novčanih primanja po osnovu branilačko-invalidske i socijalne zaštite, dodatka na djecu, stipendija i kredita učenika i studenata.

Član 25. (Odbijanje zahtjeva)

Novčana pomoć za liječenje i nabavku lijekova neće biti odobrena:

- a) ukoliko se vrši kupovina lijekova po ekonomskoj cijeni, a takvi lijekovi se nalaze na esencijalnoj listi;
- b) ukoliko su zdravstvene usluge plaćene, a isto je moglo biti obavljeno na teret sredstava obaveznog zdravstvenog osiguranja, izuzev za slučajeve za koje Komisija imenovana u skladu sa članom 28. stav (2) ove Odluke ocijeni opravdanost zahtjeva;
- c) za obavljene stomatološke usluge, izuzev ako su iste posljedica ranjavanja;
- d) za povrede na radu;
- e) u slučaju neusaglašene medicinske dokumentacije i računa za lijekove.

Član 26. (Postupak po zahtjevu)

Gradska/općinska služba kojoj je podnesen zahtjev za ostvarivanje prava na novčanu pomoć za liječenje i nabavku lijekova, dužna je u roku od sedam dana od dana podnošenja zahtjeva:

- a) utvrditi kompletnost podnesene dokumentacije i zahtijevati otklanjanje uočenih nedostataka i eventualnu dopunu dokumentacije;
- b) u slučaju potrebe izvršiti neposredan uviđaj u stvarima iz zahtjeva;
- c) sačiniti izvještaj o socijalno-ekonomskoj situaciji podnosioca zahtjeva i članova porodice;
- d) sačiniti obrazložen prijedlog o visini novčane pomoći i isti sa kompletnom dokumentacijom dostaviti Ministarstvu i
- e) donijeti rješenje o odbijanju zahtjeva u slučaju kada ocijeni da podnosilac zahtjeva ne ispunjava uslove.

Član 27. (Novčana pomoć do 200,00 KM)

- (1) Za novčanu pomoć za troškove liječenja i kupovine lijekova u iznosu do 200,00 KM, rješenje o priznavanju prava donosi gradska/općinska služba (npr. za slučaj pružanje zdravstvenih usluga na nivou primarne zdravstvene zaštite kao i u drugim slučajevima u ovisnosti od utvrđene dijagnoze, terapije kao i odobrenih sredstava za tu namjenu).
- (2) O žalbi na rješenje iz stava (1) ovog člana rješava Ministarstvo.
- (3) Pravosnažna rješenja o priznavanju prava iz stava (1) ovog člana, sa obrazloženjem za svaki pojedinačni zahtjev, gradska/općinska služba dužna je odmah, a najkasnije u roku od tri dana, dostaviti Ministarstvu na daljnju realizaciju.

Član 28.
(Prijedlog za pomoć u liječenju)

- (1) Prijedlog za odobravanje sredstava novčane pomoći za liječenje u iznosu većem od 200,00 KM sa podnesenim zahtjevom i potrebnom dokumentacijom iz člana 24. stav (1) ove Odluke, gradska/općinska služba dostavlja Ministarstvu najdalje u roku od 10 (deset) dana od dana podnošenja zahtjeva.
- (2) Podnesene zahtjeve za novčanu pomoć razmatra tročlana komisija Ministarstva, koju imenuje ministar Ministarstva posebnim rješenjem.
- (3) Zadatak Komisije je da razmotri dostavljene prijedloge gradskih/općinskih službi, izvrši uvid u priloženu dokumentaciju, konstatuje ispravnost postupka, te dostavi ministru Ministarstva obrazložen stav o opravdanosti zahtjeva sa prijedlogom o dodjeli novčane pomoći ili odbijanju zahtjeva.
- (4) U svom radu po podnesenim zahtjevima, Komisija ima pravo vršiti provjeru podnesene dokumentacije, tražiti dopunu iste, u posebnim slučajevima tražiti stručno mišljenje Ministarstva zdravstva, Zavoda, kao i drugih nadležnih ustanova u vezi sa odgovarajućim liječenjem, te nabavkom i kupovinom lijekova za pomoć u liječenju.

Član 29.
(Odobrovanje sredstava za liječenje)

- (1) Prilikom odobravanja sredstava za liječenje vodiće se računa o težini i prirodi bolesti, socijalno-ekonomskom statusu podnosioca zahtjeva, visini potrebnih sredstava, hitnosti slučaja, kao i broju podnesenih zahtjeva.
- (2) Prioritet za odobravanje sredstava imaju slučajevi teških oboljenja kao što je akutna tuberkuloza, maligna oboljenja, endemska nefropatija, hirurške intervencije na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenja mišićnog sistema, paralize i druga teška oboljenja.
- (3) Na osnovu prijedloga Komisije, o dodjeli sredstava po podnesenim zahtjevima u pojedinačnim iznosima koji ne prelaze iznos od 4.000,00 KM odlučuje ministar Ministarstva, koji istovremeno utvrđuje dinamiku isplate.
- (4) Na obrazloženi prijedlog ministra Ministarstva, zaključak o dodjeli sredstava u iznosu većem od 4.000,00 KM donosi Vlada Kantona.

Član 30.
(Izdavanje rješenja i plaćanje)

- (1) Na osnovu dostavljene obavijesti Ministarstva o odobravanju ili odbijanju pomoći, gradska/općinska služba donosi rješenje.
- (2) Na osnovu dostavljenih pravosnažnih rješenja Ministarstvo donosi odluku o plaćanju odobrenih sredstava za liječenje i nabavku lijekova.
- (3) O žalbi na rješenje iz stava (1) ovog člana rješava Ministarstvo.

Član 31.
(Dostava i pravdanje sredstava)

- (1) Gradska/općinska služba obavještava lica kojima su doznačena odobrena sredstva i istim vrši isplatu putem tekućih računa.
- (2) Gradska/općinska služba je dužna u roku od 15 dana po realizaciji pomoći dostaviti Ministarstvu pravdanje utrošenih sredstava.

DIO TREĆI - ZAVRŠNE ODREDBE

Član 32. (Sredstva za ostvarivanje prava)

Sredstva za ostvarivanje prava utvrđenih ovom Odlukom osiguravaju se u Budžetu Kantona.

Član 33. (Evidencija)

Elektronsku evidenciju o podnesenim zahtjevima i korisnicima prava vode gradske/općinske službe i Ministarstvo, po obrascima koje propisuje ministar Ministarstva, u roku od sedam dana od dana stupanja na snagu ove Odluke.

Član 34. (Instrukcije i nadzor)

- (1) U realizaciji ove Odluke, ministar Ministarstva može donijeti odgovarajuće instrukcije.
- (2) Nadzor nad provođenjem ove Odluke vrši Ministarstvo.

Član 35. (Ravnopravnost spolova)

Sve imenice koje se odnose na braniocice i članove njihovih porodica, upotrijebljene u ovoj Odluci samo u muškom ili samo u ženskom rodu, odnose se na oba spola.

Član 36. (Ranije započeti postupci)

Svi slučajevi odnosno postupci koji do dana primjene ove Odluke nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

Član 37. (Stavljanje Odluke van snage)

Danom početka primjene ove Odluke prestaje važiti Odluka o proširenom obimu prava iz zdravstvene zaštite za braniocice i članove njihovih porodica ("Službene novine Zeničko-dobojskog kantona" broj: 4/15 i 15/21).

Član 38. (Stupanje na snagu i objavljivanje Odluke)

Odluka stupa na snagu osmog dana od dana objavljivanja u "Službenim novinama Zeničko-dobojskog kantona, a primjenjuje se od 01.01.2025. godine.

Broj: _____/24

Zenica, _____ 2024. godine

PREDSJEDAVAJUĆI

Ćazim Huskić

O b r a z l o ž e n j e

PRAVNI OSNOV

Pravni osnov za donošenje Odluke o proširenom obimu prava iz oblasti zdravstvene zaštite za branioce i članove njihovih porodica (u daljem tekstu: Odluka) sadržan je u odredbama člana 7. stav (2) Zakona o dopunskim pravima branilaca i članova njihovih porodica ("Službene novine ZDK" br. 15/24), kojim je utvrđeno da će ostvarivanje prava na zdravstvenu zaštitu i to zdravstveno osiguranje, nabavka ortopedskih i drugih pomagala i njihova popravka za ratne vojne invalide te liječenje i nabavka lijekova, posebnim propisom utvrditi Skupština Kantona.

RAZLOZI ZA DONOŠENJE

Programima rada Vlade i Skupštine Zeničko-dobojskog kantona kao i Godišnjim planom rada Ministarstva za boračka pitanja Zeničko-dobojskog kantona za 2024. godinu planirano je donošenje Odluke o proširenom obimu prava iz oblasti zdravstvene zaštite za branioce i članove njihovih porodica u cilju utvrđivanja uslova, načina i postupka za ostvarivanje prava po novom Zakonu o dopunskim pravima branilaca i članova njihovih porodica („Službene novine Zeničko-dobojskog kantona“ broj: 15/24- u daljem tekstu Zakon) koji je usvojila Skupština Zeničko-dobojskog kantona, usaglašenog sa federalnim propisima koji uređuju ovu oblast.

Prilikom izrade predmetnog materijala – prijedloga Odluke isti je dostavljen kantonalnim udruženjima/ savezima od posebnog društvenog značaja koja su definisana Odlukom o finansiranju rada kantonalnih udruženja branilaca i članova njihovih porodica, na mišljenje odnosno da iznesu svoje primjedbe i sugestije. Nakon održanog zajedničkog sastanka i konsultacija pozitivno mišljenje na tekst prijedloga Odluke dalo je jedanaest kantonalnih saveza/ udruženja utvrđenih Odlukom o finansiranju rada kantonalnih udruženja branilaca i članova njihovih porodica i to: Savez dobitnika najvećih ratnih priznanja Zeničko-dobojskog kantona, Udruga nositelja ratnih odličja HVO Zeničko-dobojskog kantona, Udruženje građana ratnih vojnih invalida paraplegičara u Zeničko-dobojskom kantonu, Zajednica Udruga hrvatskih vojnih invalida Zeničko-dobojskog kantona, Organizacija porodica šehida i poginulih boraca Zeničko-dobojskog kantona, Zajednica udruga obitelji poginulih i nestalih hrvatskih branitelja domovinskog rata Zeničko-dobojskog kantona, Savez slijepih boraca Zeničko-dobojskog kantona, Jedinstvena organizacija boraca „Unija veterana“ Zeničko-dobojskog kantona, Savez demobilisanih boraca odbrambeno-oslobodilačkog rata 1992-1995, Savez udruženja antifašista i boraca iz NORa Zeničko-dobojskog kantona, Savez udruga dragovoljaca i veterana domovinskog rata HVO-a ZDK. Pozitivno mišljenje nije dao Savez ratnih vojnih invalida Zeničko-dobojskog kantona, nezadovoljni dijelom koji uređuje odobravanje pomoći za nabavku ortopedskih pomagala.

Pored zakonske obaveze donošenja ovog provedbenog akta opredjeljenje Ministarstva za boračka pitanja i Vlade Zeničko-dobojskog kantona jeste da se ne naruši dostignuti nivo prava za branioce i članove njihovih porodica samo da se u određenim segmentima, koliko je moguće naprave određena poboljšanja.

Sve izmjene u odnosu na dosadašnji propis kojim je uređena ova oblast date su u segmentu obrazloženja pravnih rješenja. Obzirom da je prilikom donošenja novog Zakona o dopunskim pravima branilaca i članova provedena javna rasprava, određeni prijedlozi koji su ocijenjeni kao mogući i opravdani uvaženi su prilikom izrade podzakonskih akata.

OBRAZLOŽENJE PRAVNIH RJEŠENJA

Članom 1. Odluke utvrđuje se predmet odluke a to je prošireni obim prava iz oblasti zdravstvene zaštite, uslovi, način i postupak za ostvarivanje istih za branioce i članove njihovih porodica koji imaju prebivalište na području Zeničko-dobojskog kantona (u daljem tekstu: Kanton), kao i povratnika u entitet Republiku Srpsku. Prošireni obim utvrđuje se kao dopunska prava u odnosu na ona koja ne mogu ili u nedovoljnom obimu ostvaruju po redovnim propisima iz oblasti zdravstvenog osiguranja.

Član 2. definiše korisnike u skladu sa Zakonom, značajan pomak napravljen je kod nezaposlenih demobiliziranih branilaca koji sada mogu ostvarivati i prava na liječenje i nabavku lijekova sa 12 mjeseci provedenih u oružanim snagama u periodu od 06.04.1992. do 23.12.1995. godine.

Član 3. definiše posebne korisnike gdje su u okviru ove Odluke napravljeni značajni pomaci i to za djecu poginulih, umrlih i nestalih branilaca kao i poginulih, umrlih i nestalih dobitnika ratnog priznanja i odlikovanja i nakon prestanka prava na porodičnu invalidninu odnosno novčani dodatak mogu ostvarivati prava na zdravstveno osiguranje i liječenje i nabavku lijekova. Pored toga pomjerene su sve dobne granice i za djecu ratnih vojnih invalida i demobiliziranih branilaca za ostvarivanje ovog prava. Sve iz razloga što je značajan broj ljudi i djece iz ove populacije, pogođeni opterećenošću zdravstvenog sistema, u potrebi za ovom vrstom dodatne pomoći.

Članom 4. obzirom da je to uvijek jedan od uslova za ostvarivanje prava, i ovdje je je kao i u Zakonu, propisano na koji način koja kategorija branilaca dokazuje svoj status.

Član 5. propisana je obaveza izrade obrazaca putem kojih se podnose zahtjevi za ostvarivanje prava na pomoć.

Član 6. precizira na koja prava se odnosi prošireni obim prava iz zdravstvene zaštite i to: zdravstveno osiguranje, nabavku ortopedskih i drugih pomagala i njihovu popravku za ratne vojne invalide i liječenje i nabavku lijekova.

Član 7. do 11. obuhvata poglavlje zdravstvenog osiguranja za branioce i članove njihovih porodica koji pravo na zdravstveno osiguranje ne mogu ostvariti po propisima iz oblasti zdravstva, po osnovu radnog odnosa, nezaposlenosti, po osnovu prava iz penzijsko-invalidskog osiguranja ili po drugom osnovu pa pravo na zdravstveno osiguranje ostvaruju po osnovu ove Odluke.

Doprinosi se obračunavaju u skladu sa Odlukom Skupštine o osnovicama i stopama doprinosa za obavezno zdravstveno osiguranje. U ovom segmentu također je propisana i procedura podnošenja zahtjeva na propisanim obrascima kod gradskih/općinskih službi, potrebna dokumentacija koja prati propisane uslove iz ove Odluke te rad gradske/općinske službe po zahtjevima.

Nakon što se izvrši prijava u jedinstveni sistem osiguranih lica po Rješenjima izdaje se zdravstvena legitimacija koju korisnik ovjerava u Zavodu zdravstvenog osiguranja ZDK, a dužan je prijaviti svaku promjenu koja može uticati na ostvarivanje ovog prava. Radi sigurnosti i pravilnog praćenja stanja i broja osiguranika, gradske/općinske službe dostavljaju mjesečne izvještaje o prijavi, odjavi i broju korisnika a kao mjera kontrole uspostavlja se provjera uslova na način da je korisnik prava na zdravstveno osiguranje, obavezan u periodu od 01.01. do 31.01. tekuće budžetske godine gradskoj/općinskoj službi dostaviti ažuriranu dokumentaciju iz člana 8. stav (2) ove Odluke, a u svrhu nastavka korištenja priznatog prava.

Član 12. do 16. je dio koje propisuje pravo na nabavku i popravak ortopedskih pomagala za ratne vojne invalide.

Ovo pravo realizuje se u vidu novčane pomoći za finansiranje nabavke ortopedskih pomagala ukoliko se iste ne mogu nabaviti po osnovu zdravstvenog osiguranja zatim kao vid sufinansiranja ortopedskih pomagala koji se obezbjeđuju putem zavoda do visine pune nabavne cijene kao i sufinansiranje dogradnje proteza donjeg i gornjeg ekstremiteta i očnih proteza kad to nije medicinski nužno u vrijeme završetka ortopedskog pomagala, u iznosu koji se utvrđuje odlukom ministra za svaku

budžetsku godinu, a koji ne može biti manji od 30% cijene koštanja ortopedskog pomagala utvrđene aktima Zavoda.

U ovom segmentu također je propisana i procedura podnošenja zahtjeva na propisanim obrascima kod gradskih/općinskih službi, potrebna dokumentacija koja prati propisane uslove za ostvarivanje prava na finansiranje/sufinansiranje ortopedskih pomagala iz ove Odluke te rad gradske/općinske službe po zahtjevima.

Pored navedenog, članom 15. su definisani posebni slučajevi kada je podnosiocu zahtjeva potrebno novo ortopedsko ili drugo pomagalo ili popravak a ukoliko se nabavka ne može ostvariti na teret sredstava Zavoda, isti je dužan pribaviti prijedlog ljekara specijaliste odnosno zdravstvene ustanove u kojoj ostvaruje primarnu zdravstvenu zaštitu, za nabavku novog odnosno popravku/servisiranje postojećeg ortopedskog ili drugog pomagala obavezna je kontrola i pregled kod nadležnog specijaliste ortopeda, čiji nalazi ne smiju biti stariji od 30 dana mora ukazivati na neophodnost nabavke ortopedskog ili drugog pomagala, određene vrste, tipa i modela, odnosno popravke/servisiranja.

Član 17. do 20. Postupak odobravanja pomoći za nabavku ortopedskih pomagala podrazumijeva i formiranje komisije koju čine dva ljekara specijalista ortopeda i službenik Ministarstva radi vještačenja u predmetu odnosno davanja stručnog mišljenja o opravdanosti zahtjeva. Komisija u svom radu, radi lakšeg odlučivanja u slučaju potrebe može i pozvati podnosioca zahtjeva na pregled ili tražiti dodatna medicinska ispitivanja.

Na prijedlog Komisije i u skladu sa kriterijima utvrđenim ovom Odlukom, ministar Ministarstva donosi obavijest o odobravanju ili odbijanju zahtjeva za pomoć za nabavku, odnosno popravak/servisiranje ortopedskog i drugog pomagala, po podnesenim pojedinačnim zahtjevima koji ne prelaze iznos od 5.000,00 KM. O odobrenom iznosu Ministarstvo dostavlja gradskoj/općinskoj službi obavijest o stavu po zaprimljenim prijedlozima na osnovu koje se izdaju rješenja. Za iznose preko 5.000,00 KM zaključak o dodjeli sredstava na obrazložen prijedlog ministra Ministarstva donosi Vlada Kantona. Također je utvrđeno da po žalbama na rješenje odlučuje Ministarstvo kao drugostepeni organ.

Član 21. definiše pravo na dodjelu novčane pomoći za liječenje i nabavku lijekova za slučaj bolesti branilaca i njihovih porodica (baznih korisnika iz člana 2.) i posebnih korisnika. S tim u vezi je precizirano i ko su članovi porodice za koje se može također ostvarivati pravo.

Član 22. podrazumijeva da se u okviru obrade zahtjeva za liječenje i nabavku lijekova pojavi medicinska dokumentacija koja ukazuje na potrebu ortopedskog pomagala uzrokovanu teškom bolesti, komisija može odobriti određeni iznos sredstava kao pomoć za liječenje koja će pomoći korisniku pri kupovini određenog pomagala.

Član 23. precizira posebne uslove koje je potrebno ispuniti za odobravanje ove vrste pomoći za liječenje i to da postoje evidentni troškovi liječenja i kupovine ordiniranih lijekova i da u toku tekuće godine nisu primili ovaj oblik pomoći za liječenje istog oboljenja.

Član 24. propisana je potrebna dokumentacija koja prati propisane uslove iz ove Odluke koja se uz zahtjev prilaže u originalu ili ovjerenoj kopiji, a ovaj član u tački i) sadrži i potrebnu dokumentaciju ukoliko se pomoć traži za liječenje u inostranstvu.

U Članu 25. navedeni su slučajevi u kojima se isključuje mogućnost dodjele pomoći u konkretnim situacijama u nastojanju da se spriječi ostvarivanje neke neosnovane dobiti kao za slučajeve ukoliko se vrši kupovina lijekova po ekonomskoj cijeni, a takvi lijekovi se nalaze na esencijalnoj listi, ukoliko su zdravstvene usluge plaćene, a isto je moglo biti obavljeno na teret sredstava obaveznog zdravstvenog osiguranja, izuzev za slučajeve za koje Komisija imenovana ocijeni opravdanost zahtjeva, za obavljene stomatološke usluge, izuzev ako su iste posljedica ranjavanja, za povrede na

radu, u slučaju neusaglašene medicinske dokumentacije i računa za lijekove, kako bi ova vrsta pomoći ispunila svoju stvarnu svrhu.

Član 26. i 27. obuhvata proceduru postupanja po zahtjevu, koje su obaveze gradske/općinske službe od provjere kompletnosti dokumentacije, eventualnog uviđaja, sačinjavanje socijalno-ekonomske situacije, sačinjavanje prijedloga o visini novčane pomoći kao i mogućnost donošenja rješenja o odbijanju zahtjeva. Gradske/općinske službe također mogu donositi i rješenja o priznavanju prava za slučajeve u kojima se može odobriti iznos do 200,00 KM, a pravosnažna rješenja se u roku 3 dana dostavljaju Ministarstvu.

Član 28. do 31. obuhvataju proceduru postupanja po prijedlogu koji gradska/općinska služba sa kompletnom dokumentacijom i zahtjevom dostavlja Ministarstvu. Komisija Ministarstva koju imenuje ministar ima zadatak da razmotri dostavljene prijedloge gradskih/općinskih službi, izvrši uvid u priloženu dokumentaciju, konstatuje ispravnost postupka, te dostavi ministru Ministarstva obrazložen stav o opravdanosti zahtjeva sa prijedlogom o dodjeli novčane pomoći ili odbijanju zahtjeva, koja pri tom ima mogućnost tražiti dopune, provjere, stručna mišljenja.

Prilikom odobravanja sredstava za liječenje vodiće se računa o težini i prirodi bolesti, socijalno-ekonomskom statusu podnosioca zahtjeva, visini potrebnih sredstava, hitnosti slučaja, kao i broju podnesenih zahtjeva. Za iznose sredstava pomoći koji ne prelaze iznos od 4.000,00 KM odlučuje ministar a preko 4.000,00 KM Vlada Kantona a prema trenutno važećoj Odluci je to iznos od 2.000,00 KM. Pomoć za liječenje i kupovinu lijekova u izuzetnim slučajevima može se osigurati i na drugi način, kroz nabavku odgovarajućih lijekova ili plaćanje zdravstvenih usluga.

Na osnovu dostavljene obavijesti Ministarstva o odobravanju ili odbijanju pomoći, gradska/općinska služba donosi rješenje a Ministarstvo donosi odluku o plaćanju odobrenih sredstava za liječenje i nabavku lijekova. O žalbi na rješenje rješava Ministarstvo.

Gradska/općinska služba obavještava lica kojima su doznačena odobrena sredstva i istim vrši isplatu putem tekućih računa te dostavlja Ministarstvu pravdanje utrošenih sredstava.

Član 32. do 35. su prelazne i završne odredbe kojima se utvrđuje da se sredstva za realizaciju prava po ovoj uredbi osiguravaju u Budžetu Kantona u skladu sa prilivom sredstava, da evidenciju i obrasce propisuje ministar Ministarstva a istu vode i prvostepeni organi. Nadzor nad provođenjem ove Uredbe ima Ministarstvo, a ministar može propisati i odgovarajuće instrukcije.

Član 36. do 38. definišu da ova Odluka stupa na snagu osam dana od objavljivanja u službenim novinama a primjenjuje se od 01.01.2025. godine, obzirom da je kraj godine a i u skladu sa Zakonom o dopunskim pravima branilaca i članova njihovih porodica čija primjena počinje od 01.01.2025. godine, a od dana početka primjene prestaje važiti Odluka o proširenom obimu prava iz zdravstvene zaštite za bratioce i članove njihovih porodica ("Službene novine Zeničko-dobojskog kantona" broj: 4/15 i 15/21). Postupci koji do dana stupanja na snagu ove Odluke nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

FINANSIJSKA SREDSTVA

Zbog očekivanog daljnjeg trenda povećanja broja zahtjeva i povećanja pojedinačnih iznosa koji se odobravaju u cilju poboljšanja zdravstvenog stanja branilačke populacije, potrebna su dodatna sredstva kako bi se opravdali svi zahtjevi za ovom vrstom pomoći. Broj korisnika i iznos sredstava u zadnjih pet godina ima tendenciju stalnog porasta, jer liječenje i veliki broj oboljelih globalni je problem pa tako obuhvata i ovu populaciju. Pored toga donošenjem ove Odluke uvode se novi korisnici djeca šehida i poginulih braniaca nakon prestanka prava na porodičnu invalidninu i djeca umrlih dobitnika ratnih priznanja i odlikovanja nakon prestanka prava na novčani dodatak. Finansijska sredstva za realizaciju ove Odluke obuhvataju transfere liječenje i nabavku lijekova, ortopedska pomagala i zdravstveno osiguranje neosiguranih lica- branilaca i članova njihovih porodica.

Iznos opredijeljenih sredstava za 2024. godinu za ove namjene je 2.300.000,00 KM a na osnovu navedenog je projiciran potreban iznos sredstava za 2025. godinu u ukupnom iznosu od 2.580.000,00 KM.



SEKRETARIJAT ZA ZAKONODAVSTVO

SECRETARIAT FOR LEGISLATION

Broj: 03-02-17786-2/24
Zenica, 09.12.2024. godine

7031

Bosna i Hercegovina Federacija Bosne i Hercegovine ZENIČKO-DOBOJSKI KANTON	
Broj: <u>13-02-17786-2/24</u>	
Datum: <u>10-12-2024</u>	

**MINISTARSTVO ZA BORAČKA PITANJA
ZENIČKO-DOBOJSKOG KANTONA**

PREDMET: Mišljenje o Prijedlogu Odluke o proširenom obimu prava iz oblasti zdravstvene zaštite za branioce i članove njihovih porodica- dostavlja se

- Veza Vaš akt broj: 13/02-02-17786-1-1/24 od 06.12.2024. godine -

U skladu sa članom 2. Uredbe o Sekretarijatu za zakonodavstvo Vlade Zeničko-dobojskog kantona („Službene novine Federacije BiH“, broj 8/96 i „Službene novine Zeničko-dobojskog kantona“, broj: 2/05) i članom 31. stav (1) tačka a) Poslovnika o radu Vlade Zeničko-dobojskog kantona („Službene novine Zeničko-dobojskog kantona“ broj: 10/21), te na osnovu uvida u tekst Prijedloga Odluke o proširenom obimu prava iz oblasti zdravstvene zaštite za branioce i članove njihovih porodica, u postupku koji se odnosi na utvrđivanje usklađenosti istog sa Ustavom, pravnim sistemom i metodološkim jedinstvom u izradi propisa dostavljamo vam slijedeće


MIŠLJENJE

Ustavni osnov Prijedloga Odluke o proširenom obimu prava iz oblasti zdravstvene zaštite za branioce i članove njihovih porodica (u daljem tekstu: Prijedlog Odluke) je pravilno utvrđen.

Prijedlog Odluke je usklađen s pravnim sistemom i urađen u skladu sa Jedinstvenim pravilima za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj 5/08).

Imajući u vidu naprijed navedeno, mišljenja smo da se Prijedlog Odluke može razmatrati na jednoj od narednih sjednica Vlade Zeničko-dobojskog kantona.

Dostavljeno:
 naslovu,
 a/a.





Broj: 07-02-17786-3-1/24
Zenica, 09.12.2024. godine

MINISTARSTVO ZA BORAČKA PITANJA

PREDMET: Mišljenje na Prijedlog Odluke o proširenom obimu prava iz oblasti zdravstvene zaštite za branioce i članove njihovih porodica - *dostavlja se*

Ministarstvo finansija je razmotrilo Prijedlog Odluke o proširenom obimu prava iz oblasti zdravstvene zaštite za branioce i članove njihovih porodica, koji je dostavljen na mišljenje uz akt Ministarstva za boračka pitanja Zeničko-dobojskog kantona, broj: 13/02-02-17786-3-1/24 od 06.12.2024. godine, te u skladu sa članom 8. Pravilnika o proceduri izrade izjave o fiskalnoj procjeni zakona, drugih propisa i akata planiranja na budžet („Službene novine Federacije BiH“, broj: 34/16 i 15/18) i članom 31. stav (1) tačka c) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), u pogledu finansijskih sredstava potrebnih za izvršenje ovog propisa, odnosno o fiskalnoj procjeni propisa, daje slijedeće

MIŠLJENJE

Članom 5. stav 2. Zakona o budžetima u Federaciji BiH („Službene novine FBiH“, broj: 102/13, 9/14, 13/14, 8/15, 91/15, 102/15, 104/16, 5/18, 11/19, 99/19 i 25a/22), propisano je da „propisi koji imaju finansijske posljedice na budžet moraju biti obrazloženi, odnosno opravdani analizom troškova i koristi“, a članom 42. stav 1. istog Zakona, propisano je da „prijedlozi zakona, uredbi i drugih propisa koje Vlada donosi ili predlaže donošenje Parlamentu moraju sadržavati procjenu finansijskih efekata na budžet.“

Članom 21. stav 2. Zakona o organizaciji organa uprave u Federaciji BiH („Službene novine Federacije BiH“, broj: 35/05), propisano je da „ako se za provođenje zakona ili drugog propisa koji se predlažu moraju osigurati određena finansijska sredstva, organi uprave obavezni su u obrazloženju tog propisa iskazati orijentacijski iznos finansijskih sredstava koja su potrebna za njegovo izvršavanje i odrediti izvore iz kojih treba osigurati ta sredstva.“

Članom 30. stav (1) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), propisano je da obrazloženje propisa, između ostalog sadrži „visinu i izvor finansijskih sredstava potrebnih za provođenje propisa“, a članom 63. stav (1) Jedinstvenih pravila za izradu pravnih propisa u Zeničko-dobojskom kantonu („Službene novine Zeničko-dobojskog kantona“, broj: 5/08), propisano je da: „Obrazloženje finansijskih sredstava sadrži procjenu potrebnih sredstava, izvora i metoda osiguranja tih sredstava za provođenje propisa.“

U Obrazloženju Prijedloga Odluke o proširenom obimu prava iz oblasti zdravstvene zaštite za branioce i članove njihovih porodica, između ostalog je navedeno: „Zbog očekivanog daljnjeg trenda povećanja broja zahtjeva i povećanja pojedinačnih iznosa koji se odobravaju u cilju poboljšanja zdravstvenog stanja branilačke populacije, potrebna su dodatna sredstva kako bi se opravdali svi zahtjevi za ovom vrstom pomoći. Broj korisnika i iznos sredstava u zadnjih pet godina ima tendenciju stalnog porasta, jer liječenje i veliki broj oboljelih globalni je problem pa tako obuhvata i ovu populaciju. Pored toga donošenjem ove Odluke uvode se novi korisnici djeca šehida i poginulih

branilaca nakon prestanka prava na porodičnu invalidninu i djeca umrlih dobitnika ratnih priznanja i odlikovanja nakon prestanka prava na novčani dodatak. Finansijska sredstva za realizaciju ove Odluke obuhvataju transfere liječenje i nabevku lijekova, ortopedska pomagala i zdravstveno osiguranje neosiguranih lica- branilaca i članova njihovih porodica.

Iznos opredijeljenih sredstava za 2024. godinu za ove namjene je 2.300.000,00 KM a na osnovu navedenog je projiciran potreban iznos sredstava za 2025. godinu u ukupnom iznosu od 2.580.000,00 KM.“

Također, u dostavljenoj Izjavi o fiskalnoj procjeni – Obrazac IFP-DA od 06.12.2024. godine je između ostalo navedeno: „Finansijskom analizom utroška sredstava u prethodnim godinama i pretpostavljenim potrebama projiciranim kroz predložena zakonska rješenja, napravljena je fiskalna procjena koja predviđa uvećanje opredijeljenih budžetskih sredstava za dodatnih cca 300.000,00 KM.“

Ministarstvo finansija ne snosi odgovornost za pravna rješenja predložena od strane Predlagača u Prijedlogu Odluke, niti odgovara za eventualne dileme, te različita tumačenja koja se mogu pojaviti prilikom primjene predloženih odredbi Prijedloga Odluke.

Odredbama člana 25. stav (2) Poslovnika o radu Vlade Zeničko-dobojskog kantona („Službene novine Zeničko-dobojskog kantona“, broj: 10/21), propisano je:

„Predlagač materijala je odgovoran da prijedlog materijala koji se dostavlja radi razmatranja na sjednicama Vlade bude u skladu sa Ustavom, važećim zakonima i provedbenim propisima.“

Odredbama tačke 8. Uputstva o izvršavanju budžeta sa jedinstvenog računa trezora („Službene novine Federacije BiH“, broj: 34/16) i člana 58. stav (1) Zakona o izvršavanju Budžeta Zeničko-dobojskog kantona za 2024. godinu („Službene novine Zeničko-dobojskog kantona“, broj: 21/23, 4/24 i 12/24), propisano je: „Odgovornost za planiranje i stvaranje obaveza u okviru propisanog budžeta je isključivo na rukovodiocu budžetskog korisnika.“

Članom 54. stav 1. Zakona o budžetima u Federaciji BiH, propisano je da „isplata bruto plaća i naknada, te naknada korisnicima prava po osnovu drugih zakona, na osnovu utvrđene osnovice može se vršiti samo do visine planiranih sredstava u budžetu za te namjene.“

Ministarstvo finansija ne može prejudicirati visinu ostvarenja javnih prihoda u narednim budžetskim godinama, pa ni realne mogućnosti preuzimanja obaveza od strane Budžeta Kantona za navedenu namjenu u narednim budžetskim godinama.

Obim preuzimanja obaveza od strane Budžeta Zeničko-dobojskog kantona, po osnovu Prijedloga Odluke moći će se vršiti samo do iznosa planiranog za navedene namjene u Budžetu Zeničko-dobojskog kantona.


Ukoliko se Vlada Zeničko-dobojskog kantona opredijeli za donošenje Prijedloga Odluke o proširenom obimu prava iz oblasti zdravstvene zaštite za braniocce i članove njihovih porodica, na osnovu budžetskog zahtjeva Ministarstva za boračka pitanja Zeničko-dobojskog kantona, bilo bi potrebno obezbjediti dodatna finansijska sredstva u Budžetu Zeničko-dobojskog kantona za naredne budžetske godine u iznosu od cca 300.000,00 KM godišnje, u odnosu na planirana sredstva u Budžetu Kantona za 2024. godinu.

S poštovanjem!

Dostavljeno:

1x Naslovu,

1x a/a.



PERIOD	SISTEMATIZOVANO				PLANIRANO PRORAČUNOM				TRENUTNO STANJE				POTREBNO		
	Postojeće stanje (n)	n+1	n+2		Postojeće stanje (n)	n+1	n+2		Postojeće stanje (n)	n+1	n+2		Postojeće stanje (n)	n+1	n+2
Rukovodilci službenici i savjetnici	5				5				5						
Službenici i namještenici	13				13				13						
Volonteri	0				0				0						
UKUPNO	18	0	0	0	18	0	0	0	18	0	0	0	0	0	0
Obrazloženje															
5. Planovnjivo obnavljanje za proračun															
NAZIV															
Garancije															
Ostalo															
E-B. fiskalni efekti na druge razine vlasti	Donošenje Odluke o proširenom obimu prava iz oblasti zdravstvene zaštite za branice i članove njihovih porodica neće proizvesti fiskalne efekte na Budžete jedinica lokalne samouprave (općine i gradove)														
NAZIV															
Proračun BiH, izvanproračunski fondovi i korisnici															
Proračun Federacije Bosne i Hercegovine, Federalni izvanproračunski fondovi i korisnici															
Proračun kantona, izvanbudžetski fondovi i korisnici															
Proračun Brčko distrikta Bosne i Hercegovine															
Jedinice lokalne samouprave (općine i gradovi)															
Proračun općine Zenica															



Zenica, 02.12.2024. godine

Mjesto i datum

Mišljenje boračkih udruženja


Ovim putem izjavljujemo da je Ministarstvo za boračka pitanja Zeničko-dobojskog kantona, blagovremeno, radi davanja prijedloga i sugetija i našem udruženju dostavilo tekstove prijedloga uredbi i omogućilo učešće u izradi akata, kako slijedi:

- *Odluka o proširenom obimu prava iz oblasti zdravstvene zaštite za braniocce i članove njihovih porodica*
- *Uredba o dodjeli kredita za zapošljavanje branilaca i članova njihovih porodica*
- *Uredba o stipendiranju redovnog studija branilaca i članova njihovih porodica*
- *Uredba o sufinansiranju sportskih aktivnosti ratnih vojnih invalida*
- *Uredba o nakanadi troškova podizanja nišana/ nadgrobnog spomenika*
- *Uredba o nakanadi troškova dženaze/sahrane branilaca i članova njihovih porodica*

Svojem potpisom i pečatom iskazujemo pozitivno mišljenje na predložene tekstove koji su u prilogu ovog akta.

Naziv Udruženja, predstavnik, potpis i pečat:

1. SAVEZ DOBITNIKA NAJVEĆIH RATNIH PRIZNANJA
ZENIČKO-DOBOJSKOG KANTONA



2. ORGANIZACIJA PORODICA ŠEHIDA I POGINULIH BORACA
ZENIČKO-DOBOJSKOG KANTONA


3. SAVEZ RATNIH VOJNIH INVALIDA
ZENIČKO-DOBOJSKOG KANTONA

4. JEDINSTVENA ORGANIZACIJA BORACA „UNIJA VETERANA“
ZENIČKO-DOBOJSKOG KANTONA




5. SAVEZ DEMOBILISANIH BORACA
ODBRAMBENO OSLOBODILAČKOG RATA 1992-1995

Za Memić Fuadq



6. UDRUGA NOSITELJA RATNIH ODLIČJA HVO
ZENIČKO-DOBOJSKOG KANTONA



7. ZAJEDNICA UDRUGA I ČLANOVA HRVATSKIH VOJNIH
INVALIDA ZENIČKO-DOBOJSKOG KANTONA

8. ZAJEDNICA UDRUGA OBITELJI POGINULIH I NESTALIH HRVATSKIH
BRANITELJA DOMOVINSKOG RATA
ZENIČKO-DOBOJSKOG KANTONA



9. SAVEZ UDRUGA DRAGOVOLJACA I VETERANA
DOMOVINSKOG RATA HVO-A ZDK



10. UDRUŽENJE GRAĐANA RATNIH VOJNIH INVALIDA
PARAPLEGIČARA U ZENIČKO-DOBOJSKOM KANTONU



11. SAVEZ SLIJEPIH BORACA
ZENIČKO-DOBOJSKOG KANTONA



12. SAVEZ UDRUŽENJA ANTIFAŠISTA I BORACA I NOR-A
ZENIČKO-DOBOJSKOG KANTONA



(4) U stavu (6) brojevi: „31.12.2014.“ zamjenjuju se brojevima: 31.12.2018.“.

Član 3.
(Izmjena člana 156. - Priznavanje inostranih kvalifikacija i perioda studija)

Član 156. mijenja se i glasi:

- (1) „Priznavanje inostranih kvalifikacija i perioda studija vršit će se prema Pravilniku o priznavanju inostranih obrazovnih kvalifikacija, koji će donijeti Ministarstvo za obrazovanje, nauku, kulturu i sport.
- (2) Do donošenja Pravilnika o priznavanju inostranih obrazovnih kvalifikacija primjenjivat će se odredbe Zakona o nostrifikaciji i ekvivalenciji inostranih školskih svjedočanstava – prečišćeni tekst („Službeni list SR BiH“, broj 7/88)“.

Član 4.
(Stupanje na snagu)

Zakon stupa na snagu narednog dana od dana objavljivanja u „Službenim novinama Zeničko-dobojskog kantona“.

Broj: 01-02-12931/15
Datum, 17.06.2015. godine
Zenica

PREDSJEDAVALA
Draženka Subašić, s.r.

134.

Na osnovu člana 29. stav 2. i člana 30. stav 1. i 3. Zakona o unutrašnjim poslovima Zeničko-dobojskog kantona - Prečišćeni tekst („Službene novine Zeničko-dobojskog kantona“ broj: 15/04, 11/05 i 9/09), Skupština Zeničko-dobojskog kantona na 9. sjednici održanoj dana 19.05.2015. godine, donosi:

ODLUKU

o imenovanju Nezavisnog odbora za izbor i reviziju

Član 1.

Imenuje se Nezavisni odbor za izbor i reviziju, u sljedećem sastavu:

1. **Bjelopoljak Ahmed** – iz reda građana,
2. **Grujo Martin** – iz reda građana,

3. **Marković-Sekulić Željka** – iz reda građana,
4. **Spahić Avdija** – iz reda građana,
5. **Rezaković Nevzeta** – iz reda građana,
6. **Mehićić Munever** – predstavnik MUP-a,
7. **Orlić Suad** – predstavnik MUP-a.

Član 2.

Imenovanje Nezavisnog odbora za izbor i reviziju vrši se na period od četiri godine.

Član 3.

Odluka stupa na snagu narednog dana od dana objavljivanja u "Službenim novinama Zeničko-dobojskog kantona".

Broj: 01-34-11294/15
Datum, 20.05.2015. godine
Zenica

PREDSJEDAVALA
Draženka Subašić, s.r.

135.

Na osnovu člana 37. stav 1. tačka f) Ustava Zeničko-dobojskog kantona i člana 6. stav (2) Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj: 1/14) Skupština Zeničko-dobojskog kantona na 9. sjednici održanoj 19.05.2015. godine donosi

ODLUKU

**O PROŠIRENOM OBIMU PRAVA IZ OBLASTI
ZDRAVSTVENE ZAŠTITE ZA BRANIOCE I
ČLANOVE NJIHOVIH PORODICA**

DIO PRVI - OPĆE ODREDBE

Član 1.

(Predmet Odluke)

Ovom Odlukom utvrđuje se prošireni obim prava iz oblasti zdravstvene zaštite, uvjeti, način i postupak za ostvarivanje istih za branioce i članove njihovih porodica koji imaju prebivalište na području Zeničko-dobojskog kantona (u daljem tekstu: Kanton), kao i povratnika u Republiku Srpsku koji ostvaruju osnovna prava iz

branilačko-invalidske zaštite u općinama Kantona ili koji su na evidenciji nadležnog organa za vojne evidencije u općinama Kantona.

Član 2.
(Korisnici prava)

(1) Korisnici prava po ovoj Odluci su:

- a) dobitnici ratnih priznanja ili odlikovanja;
- b) ratni vojni invalidi;
- c) demobilizirani branioci sa statusom učesnika rata - pravo iz člana 7. tačka a);
- d) demobilizirani branioci koji su u periodu od 06.04.1992. do 23.12.1995. godine u sastavu Oružanih snaga proveli najmanje 24 mjeseca odnosno 12 mjeseci, ukoliko su u OS pristupili kao maloljetno lice ili neposredno po punoljetstvu - prava iz člana 7. tačke b) i c);
- e) članovi porodice šehida, poginulih, umrlih i nestalih branilaca i umrlih ratnih vojnih invalida;
- f) članovi uže porodice poginulih, umrlih ili nestalih dobitnika ratnog priznanja ili odlikovanja;
- g) članovi porodice umrlih ratnih vojnih invalida i umrlih demobiliziranih branilaca, koji su kao posebni korisnici utvrđeni odredbama člana 4. ove Odluke.

(2) Prava po ovoj Odluci lica iz stava (1) ovog člana mogu koristiti pod uvjetom da imaju prebivalište na području Kantona u trajanju od najmanje 24 mjeseca u kontinuitetu, osim povratnika u Republiku Srpsku.

Član 3.
(Definicije)

Pojmovi i definicije iz ove Odluke: dobitnik ratnog priznanja ili odlikovanja, ratni vojni invalid, demobilizirani branilac, učesnik rata, član porodice šehida, poginulog, umrlog, nestalog branioca i umrlog ratnog vojnog invalida i član uže porodice poginulog, umrlog ili nestalog dobitnika ratnog priznanja ili odlikovanja, upotrijebljeni su u skladu sa odredbama Zakona o pravima branilaca i članova njihovih porodica ("Službene novine Federacije Bosne i Hercegovine" broj: 33/04, 56/05, 70/07 i 9/10) i Zakona o posebnim pravima dobitnika ratnih priznanja i odlikovanja i članova njihovih porodica ("Službene novine Federacije BiH" broj: 70/05, 61/06 i 9/10).

Član 4.

(Posebni korisnici)

(1) Prava po ovoj Odluci može koristiti i:

- a) dijete šehida, poginulog, umrlog, nestalog branioca, kojem je prestalo pravo na porodičnu invalidninu, do navršene 35. godine života;
- b) dijete poginulog, umrlog ili nestalog dobitnika ratnog priznanja ili odlikovanja, osim lica iz tačke a) ovog člana, kojem je prestalo pravo na mjesečni novčani dodatak i dijete umrlog ratnog vojnog invalida koje nije korisnik prava na porodičnu invalidninu, do navršene 30. godine života;
- c) dijete umrlog demobiliziranog branioca koji je u redovima Oružanih snaga proveo najmanje dvije godine i koje je sa istim živjelo u zajedničkom domaćinstvu ili ga je isti izdržavao najmanje posljednju godinu dana prije smrti, do navršene 30. godine života;
- d) udovica umrlog demobiliziranog branioca koji je u redovima Oružanih snaga proveo najmanje dvije godine, i koja je sa istim živjela u braku najmanje dvije posljednje godine dana prije smrti, pod uvjetom da nema druge prihode i da nije stupila u brak ili vanbračnu zajednicu;
- e) roditelji umrlog ratnog vojnog invalida ili demobiliziranog branioca koji je u redovima Oružanih snaga proveo najmanje dvije godine, ukoliko ih je isti izdržavao posljednjih godinu dana prije smrti.

(2) Pojmovi dijete ratnog vojnog invalida i dijete demobiliziranog branioca, upotrijebljeni su u skladu sa odredbama Zakona o dopunskim pravima branilaca i članova njihovih porodica ("Službene novine Zeničko-dobojskog kantona" broj: 1/14).

Član 5.

(Dokazivanje statusa)

U postupku ostvarivanja prava po ovoj Odluci, branioci i članovi njihovih porodica svoj status dokazuju rješenjem nadležnog organa o priznavanju prava na ličnu i porodičnu invalidninu za ratnog vojnog invalida odnosno člana porodice šehida, poginulog, umrlog, nestalog branioca ili umrlog ratnog vojnog invalida; o priznavanju prava na mjesečni novčani dodatak za dobitnike ratnih priznanja i odlikovanja i članove uže porodice poginulog, umrlog ili nestalog dobitnika ratnog priznanja ili odlikovanja; uvjerenjem nadležnog organa o periodu učešća u Oružanim snagama za demobiliziranog branioca, te na osnovu smrtnog lista i uvjerenja o učešću u Oružanim

snagama umrlog demobiliziranog branioca, izdatog u skladu sa Zakonom o upravnom postupku ("Službene novine FBiH" broj: 2/98 i 48/99).

Član 6.

(Obrasci zahtjeva za ostvarivanje prava)

Zahtjevi za ostvarivanje prava po ovoj Odluci podnose se na obrascima koje propisuje ministar Ministarstva za boračka pitanja (u daljnjem tekstu: Ministarstvo), u roku od osam dana od dana stupanja na snagu ove Odluke.

DIO DRUGI - PRAVA

Član 7.

(Prava po Odluci)

Prošireni obim prava iz zdravstvene zaštite po ovoj Odluci odnosi se na:

- a) Zdravstveno osiguranje;
- b) Nabavku ortopedskih i drugih pomagala i njihovu opravku;
- c) Liječenje i nabavku lijekova.

POGLAVLJE I. ZDRAVSTVENO OSIGURANJE

Član 8.

(Korisnici prava)

- (1) Branioci i članovi njihovih porodica iz člana 2. i 4. ove Odluke, koji pravo na zdravstveno osiguranje ne mogu ostvariti u skladu sa odredbama Zakona o zdravstvenoj zaštiti ("Službene novine Federacije BiH" broj: 46/10 i 75/13) i Zakona o zdravstvenom osiguranju ("Službene novine Federacije BiH" broj: 30/97, 7/02, 70/08 i 48/11) po osnovu radnog odnosa, nezaposlenosti, po osnovu prava iz penzijsko-invalidskog osiguranja ili po drugom osnovu, pravo na zdravstveno osiguranje ostvaruju po osnovu ove Odluke.
- (2) Sredstava za realizaciju prava iz stava (1) ovog člana osiguravaju se u Budžetu Zeničko-dobojskog kantona, na budžetskoj poziciji Ministarstva.
- (3) Visinu stope doprinosa za zdravstveno osiguranje korisnika zdravstvene zaštite po ovoj Odluci, predlaže Ministarstvo.
- (4) Izuzetno, pravo na zdravstveno osiguranje po ovoj Odluci može ostvariti i lice koje po osnovu postojećeg zdravstvenog osiguranja u Republici Hrvatskoj ne može ostvariti pravo na zdravstvenu zaštitu u mjestu prebivališta na području Kantona.

Član 9.

(Podnošenje zahtjeva i donošenje rješenja)

- (1) Zahtjev za priznavanje prava na zdravstveno osiguranje za sebe i članove svoje porodice, korisnik prava podnosi općinskoj službi nadležnoj za poslove branilačko-invalidske zaštite prema mjestu prebivališta podnosioca zahtjeva, odnosno na području koje ostvaruje prava iz branilačko-invalidske zaštite ili je na evidenciji nadležnog organa za vojne evidencije (u daljnjem tekstu: općinska služba).
- (2) Uz zahtjev iz stava (1) ovog člana, koji mora biti obrazložen, zainteresovana lica prilažu:
 - a) dokaz o statusu branioca i člana njegove porodice,
 - b) dokaz o prebivalištu u trajanju od najmanje 24 mjeseca u kontinuitetu do dana podnošenja zahtjeva (osim povratnika u RS),
 - c) dokaz o nemogućnosti ostvarivanja prava podnosioca zahtjeva i članova njegove porodice po drugom osnovu (uvjerenje o nezaposlenosti sa navedenim razlozima zbog kojih lice nije osigurano po tom osnovu), uvjerenje Porezne uprave, uvjerenje PIO/MIO,
 - d) dokaz o posljednjem osnovu zdravstvenog osiguranja do dana podnošenja zahtjeva (kopija zdravstvene legitimacije).
- (3) Općinska služba kojoj je podnesen obrazloženi zahtjev sa potrebnom dokumentacijom za priznavanje prava na zdravstveno osiguranje po ovoj Odluci, dužna je u roku od sedam dana dostaviti Ministarstvu prijedlog o odbijanju ili priznavanju prava na zdravstveno osiguranje.
- (4) Na osnovu primljene obavijesti Ministarstva o saglasnosti ili odbijanju dostavljenog prijedloga, općinska služba donosi rješenje o priznavanju prava ili odbijanju zahtjeva za zdravstveno osiguranje.
- (5) Doneseno rješenje općinska služba dostavlja Ministarstvu i podnosiocu zahtjeva.
- (6) O žalbi na rješenje iz stava (4) ovog člana rješava Ministarstvo.

Član 10.

(Prijavljivanje korisnika i izdavanje zdravstvene knjižice)

Prijavu na zdravstveno osiguranje lica kojem je rješenjem općinske službe priznato pravo na zdravstveno osiguranje na osnovu ove Odluke, popunjava općinska

služba i istu dostavlja Poreznoj upravi FBiH, Kantonalni porezni ured Zenica (u daljnjem tekstu: Porezna uprava) u jedinstven sistem registracije prijava/odjava osiguranih lica u određenim okolnostima - Obrazac JS 3120, te izdaje zdravstvenu legitimaciju, koju korisnik zdravstvene zaštite ovjerava u Zavodu zdravstvenog osiguranja Zeničko-dobojskog kantona (u daljnjem tekstu: Zavod).

Član 11.

(Odjava korisnika zdravstvene zaštite)

- (1) Kada se iz bilo kojeg razloga steknu uvjeti za prestanak prava na korištenje zdravstvene zaštite po ovoj Odluci, općinska služba donosi rješenje o prestanku prava na zdravstveno osiguranje, te dostavlja objavu osiguranja Poreznoj upravi i Ministarstvu u roku od osam dana od dana saznanja za promjenjene okolnosti koje su od uticaja za prestanak odnosno daljnje korištenje prava.
- (2) Korisnik prava je dužan u roku od 15 dana prijaviti svaku promjenu koja povlači izmjenu ili gubitak prava na zdravstveno osiguranje po ovoj Odluci.

Član 12.

(Revizija i dostavljanje izvještaja)

- (1) Općinska služba je dužna vršiti redovnu mjesečnu reviziju ostvarivanja prava na zdravstveno osiguranje korisnika prava po ovoj Odluci.
- (2) Izvještaj o izvršenoj reviziji iz stava (1) ovog člana sa podacima o broju korisnika zdravstvene zaštite i broju objavljenih lica po ovoj Odluci, općinska služba dostavlja Ministarstvu najdalje do 5. u mjesecu za prethodni mjesec.
- (3) Ukoliko općinska služba ne dostavi izvještaj o izvršenoj reviziji sa podacima i u roku iz stava (2) ovog člana, Ministarstvo će pokrenuti postupak objave korisnika prava.

POGLAVLJE II. NABAVKA ORTOPEDSKIH I DRUGIH POMAGALA I NJIHOVA OPRAVKA

Član 13.

(Sadržina prava)

Lica iz člana 2. i 4. ove Odluke, u skladu sa važećim zakonskim propisima ostvaruju pravo na novčanu pomoć za:

- a) finansiranje nabavke odgovarajućih proteza i drugih ortopedskih pomagala, ukoliko iste ne mogu

ostvariti po osnovu zdravstvenog osiguranja, preporučenih od strane nadležnog ljekara (za profesionalno ili radno angažovane, aktivne sportiste i slučajeve izmijenjenog zdravstvenog stanja) i odobrene od strane stručne komisije u vremenu završavanja ortopedskog pomagala ili u bilo koje vrijeme kad je to medicinski nužno;

- b) ugradnju modulskih sklopova u standardne proteze kod visokih i dvostrukih amputacija donjih ekstremiteta;

- c) finansiranje ostalih potreba:

- 1) sufinansiranje nabavke ortopedskih pomagala koji se nabavljaju na teret sredstava Zavoda, do visine pune nabavne cijene, i to:
 1. invalidskih kolica sa sljedećim karakteristikama; težine do 10 kg; sklopiva i preklopiva, pogodna za lakše savladavanje arhitektonskih barijera, sa dobrom i jednostavnom mogućnošću manevrisanja, pogodna za samostalno unošenje u automobil i sl.;
 2. antidekubitalnih jastuka sa sljedećim karakteristikama: da dimenzijama odgovaraju veličini kolica, da imaju dovoljan broj ventila za puhanje čime se omogućava željeni balans u pojedinim dijelovima jastuka, da kvalitetom sprječavaju nastanak dekubitusa i dr.;
 3. antidekubitalnih madraca koji kvalitetom sprečavaju nastanak dekubitusa i doprinose što bržem zarastanju postojećih rana.
- 2) nabavku tiflehničkih pomagala za slijepce i slabovidne RVI: bijeli štap, naočale, slušni aparat i dr.
- 3) finansiranje servisiranja, opravke i nabavke rezervnih dijelova za ortopedska pomagala u punom iznosu, nakon isteka garantnog roka i nabavke materijala koji omogućavaju korištenje ortopedskog pomagala.

Član 14.

(Podnošenje zahtjeva)

Zahtjev za novčanu pomoć za nabavku i opravku/servisiranje ortopedskog i drugog pomagala, korisnik prava podnosi općinskoj službi.

Član 15.

(Potrebna dokumentacija)

- (1) Uz zahtjev za nabavku odnosno opravku/servisiranje ortopedskog i drugog pomagala, korisnik prava obavezno prilaže:

- a) dokaz o statusu branioca i člana njegove porodice;
 - b) fotokopiju lične karte;
 - c) dokaz o prebivalištu u trajanju od najmanje 24 mjeseca u kontinuitetu do dana podnošenja zahtjeva (osim povratnika u RS);
 - d) odgovarajući medicinski nalaz sa prijedlogom;
 - e) potvrdu nadležnog ljekara specijaliste o potrebi ortopedskog i drugog pomagala, ovjerenu od strane Zavoda, sa iskazanim ličnim učešćem ili 100% plaćanjem;
 - f) originalni predračun koštanja nabavke ortopedskog i drugog pomagala.
- (2) Uz zahtjev za opravku/servisiranje ortopedskog i drugog pomagala obavezno se prilaže originalni predračun koštanja potrebne opravke/servisiranja.

Član 16.

(Posebni slučajevi)

- (1) U slučajevima kada je korisniku potrebno novo ortopedsko ili drugo pomagalo ili opravka/servisiranje pomagala koje koristi, a ukoliko se nabavka ne može ostvariti na teret sredstava Zavoda, isti je dužan pribaviti prijedlog ljekara specijaliste odnosno zdravstvene ustanove u kojoj ostvaruje primarnu zdravstvenu zaštitu, za nabavku novog odnosno opravku/servisiranje postojećeg ortopedskog ili drugog pomagala.
- (2) Prijedlog ljekara iz stava (1) ovog člana se izdaje nakon izvršenog neposrednog uvida u zdravstveni karton korisnika prava i upoznavanja sa podacima o ranijem liječenju, a isti mora biti obrazložen i sadržavati podatke o vrstu i tipu ortopedskog ili drugog pomagala, odnosno opravci/servisiranju.
- (3) Pored medicinske dokumentacije iz koje se može utvrditi dijagnoza bolesti i način liječenja korisnika prava (otpusnice iz ustanova gdje je obavljeno stacionarno liječenje, nalaza ljekara specijalista hirurgije, ortopeda, traumatologa, neurohirurga, neuropsihijatra i sl.), obavezna je kontrola i pregled kod nadležnog specijaliste ortopeda, čiji nalazi ne smiju biti stariji od 30 dana.
- (4) Nalaz specijaliste ortopeda mora ukazivati na neophodnost nabavke ortopedskog ili drugog pomagala, određene vrste, tipa i modela, odnosno opravke/servisiranja.

Član 17.

(Prijedlog općinske službe)

U roku od pet dana po prijemu zahtjeva općinska služba utvrđuje prijedlog za nabavku odnosno opravku/servisiranje ortopedskog i drugog pomagala (u daljnjem tekstu: prijedlog općinske službe), koji uz kompletnu dokumentaciju korisnika prava (zahtjev, prijedlog ljekara i prateću medicinsku dokumentaciju) dostavlja Ministarstvu na daljnji postupak.

Član 18.

(Komisija)

- (1) Nakon stručne obrade prijedloga općinske službe od strane službenika Ministarstva nadležnog za poslove nabavke ortopedskih i drugih pomagala, isti se sa kompletnom dokumentacijom prosljeđuje Komisiji za odobravanje nabavke ortopedskog pomagala (u daljnjem tekstu: Komisija), koju svojim rješenjem imenuje ministar Ministarstva, u roku od pet dana od stupanja na snagu ove Odluke.
- (2) Komisiju čine dva ljekara specijalista ortopeda i službenik Ministarstva iz stava (1) ovog člana, koji je ujedno i sekretar Komisije.
- (3) Posebnim rješenjem ministra Ministarstva utvrđuje se naknada za rad članova Komisije, izuzev za sekretara Komisije.
- (4) Sjednice Komisije, u dogovoru sa ostalim članovima, zakazuje sekretar Komisije.
- (5) Sjednice se održavaju po potrebi, a o radu Komisije vodi se zapisnik.

Član 19.

(Rad Komisije)

- (1) Komisija vrši vještačenje po svakom zahtjevu pojedinačno.
- (2) U slučaju potrebe, Komisija poziva podnosioca zahtjeva na pregled, a može zatražiti i druga medicinska ispitivanja.
- (3) U nalazu i mišljenju Komisije se navodi broj i datum održavanja sjednice, da li je potrebna nabavka ortopedskog ili drugog pomagala i kojeg modela, te prijedlog ministru Ministarstva za odbijanje zahtjeva ili odobravanje sredstava za nabavku, odnosno servisiranje/opravku ortopedskog i drugog pomagala.

- (4) U nalazu i mišljenju se navodi razlog za slučaj nemoćnosti odobravanja nabavke ili servisiranja/opravke ortopedskog i drugog pomagala.

Član 20.

(Odluka o odobravanju pomoći i izdavanje rješenja)

- (1) Na prijedlog Komisije i u skladu sa kriterijima utvrđenim ovom Odlukom, ministar Ministarstva donosi odluku o odobravanju pomoći za nabavku, odnosno servisiranje/opravku ortopedskog i drugog pomagala, po podnesenim pojedinačnim zahtjevima koji ne prelaze iznos od 3.000,00 KM.
- (2) Na obrazloženi prijedlog ministra Ministarstva, zaključak o dodjeli sredstava u iznosu većem od 3.000,00 KM donosi Vlada Kantona.
- (3) Ministarstvo dostavlja općinskoj službi odluku i obavijest o stavu po zaprimljenim prijedlozima, uz povrat kompletne dokumentacije.
- (4) Na osnovu dostavljene odluke Ministarstva o odobravanju sredstava, općinska služba donosi rješenje u skladu sa članom 211. Zakona o upravnom postupku.
- (5) Uplata odobrene novčane pomoći za nabavku, odnosno servisiranje/opravku ortopedskih i drugih pomagala se vrši na račun općinske službe, koja vrši isplatu odobrenih sredstava na račun prodavca, odnosno korisnika koji dostavi dokaz o uplati sredstava, a u roku od 15 dana po realizaciji pomoći dostavlja Ministarstvu pravdanje utrošenih sredstava.
- (6) Rješenje o odbacivanju ili odbijanju zahtjeva, u skladu sa zaključkom Komisije u tom smislu, općinska služba donosi u skraćenom postupku na osnovu člana 139. stav 1. i 2. Zakona o upravnom postupku.
- (7) O žalbi na rješenje općinske službe rješava Ministarstvo.

Član 21.

(Ponovni zahtjev)

Podnosioci zahtjeva kojima nije odobrena nabavka ortopedskog ili drugog pomagala, mogu podnijeti novi zahtjev nakon isteka roka od godine dana od dana konačnosti rješenja o odbijanju prethodnog zahtjeva.

POGLAVLJE III. LIJEČENJE I NABAVKA LIJEKOVA

Član 22.

(Prava ratnih vojnih invalida)

- (1) Ratni vojni invalidi, u skladu sa ovom Odlukom, ostvaruju pravo na novčanu pomoć u svrhu naknade troškova specijalističkih pregleda, nabavke lijekova i sanitetskog materijala u cilju liječenja rana i povreda posljedično vezanih za učešće u ratu.
- (2) Zahtjev za pomoć za ostvarenje prava iz stava (1) ovog člana ratni vojni invalid podnosi općinskoj službi, zajedno sa nalazom nadležne zdravstvene ustanove odnosno ljekara specijaliste i drugim dokazima iz kojih je vidljiva opravdanost njegovog zahtjeva.

Član 23.

(Liječenje branilaca i članova njihovih porodica)

Pravo na novčanu pomoć u svrhu naknade troškova liječenja i nabavke lijekova za potrebe lica iz člana 2. i 4. ove Odluke i članova njihovih porodica, ostvaruje se u skladu sa odredbama ove Odluke.

Član 24.

(Troškovi liječenja)

Pod troškovima liječenja podrazumjevaju se i troškovi prijevoza veći od 50,00 KM ostvareni u jednom mjesecu, a visina novčane pomoći cijenit će se kroz broj odlazaka u zdravstvenu ustanovu u određenom vremenskom periodu.

Član 25.

(Posebni uvjeti)

- (1) Novčanu pomoć za ostvarenje prava iz člana 23. ove Odluke, branioci i članovi njihovih porodica mogu ostvariti pod uvjetom da:
- postoje evidentni troškovi liječenja i kupovine ordiniranih lijekova koji nisu na esencijalnoj listi;
 - da u toku tekuće godine nisu primili ovaj oblik pomoći za liječenje istog oboljenja (osim u slučajevima oboljenja iz člana 31. stav 2. ove Odluke).

Član 26.

(Potrebna dokumentacija)

- (1) Zahtjev za odobravanje pomoći za liječenje i nabavku lijekova lica iz člana 2. i 4. ove Odluke podnose općinskoj službi, a uz isti prilažu sljedeću dokumentaciju:

- a) dokaz o statusu branioca i člana njegove porodice;
- b) fotokopija lične karte;
- c) dokaz o prebivalištu u trajanju od najmanje 24 mjeseca u kontinuitetu do dana podnošenja zahtjeva (osim povratnika u RS);
- d) dokaz o prihodima članova domaćinstva (primanja po osnovu radnog odnosa, uvjerenje Službe za zapošljavanje o nezaposlenosti podnosioca zahtjeva i članova njegovog domaćinstva i dr.);
- e) ovjerena izjava o zajedničkom domaćinstvu (kućna lista);
- f) medicinska dokumentacija i drugi dokazi iz kojih se mogu utvrditi troškovi liječenja i kupovine ordiniranih lijekova (nalaz ljekara specijaliste sa utvrđenom dg i th i drugi nalazi ljekara iz kojih se mogu utvrditi troškovi liječenja i kupovine ordiniranih lijekova) sa priloženim računima o troškovima liječenja i kupovini ordiniranih lijekova;
- g) dokument (potvrda, rješenje) izdat od strane Zavoda o participaciji u troškovima nabavke lijekova koji nisu na esencijalnoj listi, ukoliko je riječ o kupovini lijekova koji se ne propisuju i izdaju na teret sredstava obaveznog zdravstvenog osiguranja;
- h) odluku Komisije Zavoda o odobravanju liječenja van Kantona, ukoliko se zahtjev odnosi na liječenje van Kantona;
- i) ukoliko se pomoć traži za liječenje u inozemstvu potrebno je priložiti: potvrdu (nalaz) konzilija ljekara specijaliste nekog od kliničkih centara da liječenje nije moguće obaviti u BiH, potpisanu od strane tri klinička doktora i šefa klinike, potvrdu da liječenja navedene bolesti ne spada u oboljenja koja se liječe na teret Fonda solidarnosti FBiH, te potvrdu Zavoda o učešću u troškovima liječenja i kupovine lijekova na teret sredstava Zavoda, kao i priloženim predračunom / računom o troškovima liječenja i kupovine lijekova i
- j) druge dokaze iz kojih se može utvrditi opravdanost zahtjeva.

(2) Prihod u smislu stava (1) tačka d) ovog člana čine primanja koje članovi domaćinstva ostvaruju po osnovu plaća i drugih primanja iz radnog odnosa, starosne, invalidske i porodične penzije, privredne, uslužne i druge djelatnosti i dopunskog rada, osim novčanih primanja po osnovu branilačko-invalidske i socijalne zaštite, dodatka na djecu, stipendija i kredita učenika i studenata.

Član 27.

(Odbijanje zahtjeva)

Novčana pomoć za liječenje i nabavku lijekova neće biti odobrena:

- a) ukoliko se vrši kupovina lijekova po ekonomskoj cijeni, a takvi lijekovi se nalaze na esencijalnoj listi ili lijekova za koje postoji zamjena istog generičkog sastava, a nalaze se na esencijalnoj listi;
- b) ukoliko su zdravstvene usluge plaćene, a isto je moglo biti obavljeno na teret sredstava obaveznog zdravstvenog osiguranja, izuzev za slučajeve iz člana 22. ove Odluke;
- c) za obavljene stomatološke usluge, izuzev ako su iste posljedica ranjavanja;
- d) u slučaju neusaglašene medicinske dokumentacije i računa za lijekove.

Član 28.

(Postupak po zahtjevu)

Općinska služba kojoj je podnesen zahtjev za ostvarenje prava na novčanu pomoć za liječenje i nabavku lijekova, dužna je u roku od sedam dana od dana podnošenja zahtjeva:

- a) utvrditi kompletnost podnesene dokumentacije i zahtijevati otklanjanje uočenih nedostataka i eventualnu dopunu dokumentacije;
- b) u slučaju potrebe izvršiti neposredan uviđaj u stvarima iz zahtjeva;
- c) sačiniti izvještaj o socijalno-ekonomskoj situaciji podnosioca zahtjeva i članova porodice;
- d) sačiniti obrazložen prijedlog o visini novčane pomoći ili odbijanju zahtjeva i isti sa kompletnom dokumentacijom dostaviti Ministarstvu.

Član 29.

(Novčana pomoć do 200,00 KM)

- (1) Na osnovu priložene dokumentacije iz člana 26. Odluke i drugih dokaza iz kojih se mogu utvrditi troškovi liječenja i kupovine lijekova u iznosu do 200,00 KM, rješenje o priznavanju prava ili odbijanju zahtjeva donosi općinska služba.
- (2) O žalbi na rješenje iz stava (1) ovog člana rješava Ministarstvo.

- (3) Pravosnažna rješenja o priznavanju prava iz stava (1) ovog člana, sa obrazloženjem za svaki pojedinačni zahtjev, općinska služba dužna je odmah, a najkasnije u roku od tri naredna dana, dostaviti Ministarstvu na daljnju realizaciju.

Član 30.

(Prijedlog za pomoć u liječenju)

- (1) Prijedlog za odobravanje sredstava novčane pomoći za liječenje u iznosu većem od 200,00 KM sa podnesenim zahtjevom i potrebnom dokumentacijom iz člana 26. Odluke, općinska služba dostavlja Ministarstvu najdalje u roku od osam dana od dana podnošenja zahtjeva.
- (2) Podnesene zahtjeve za novčanu pomoć po ovoj Odluci, razmatra tročlana komisija Ministarstva, koju imenuje ministar Ministarstva posebnim rješenjem.
- (3) Zadatak Komisije je da razmotri dostavljene prijedloge općinskih službi, izvrši uvid u priloženu dokumentaciju, konstatuje ispravnost postupka, te dostavi ministru Ministarstva obrazložen stav o opravdanosti zahtjeva sa prijedlogom o dodjeli novčane pomoći.
- (4) U svom radu po podnesenim zahtjevima, Komisija ima pravo vršiti provjeru podnesene dokumentacije, tražiti dopunu iste, te u posebnim slučajevima tražiti stručno mišljenje Ministarstva zdravstva, Zavoda, kao i drugih nadležnih ustanova u vezi sa odgovarajućim liječenjem, te nabavkom i kupovinom lijekova za pomoć u liječenju.

Član 31.

(Odobrovanje sredstava za liječenje)

- (1) Prilikom odobravanja sredstava za liječenje vodiće se računa o socijalno-ekonomskom statusu podnosioca zahtjeva, težini i prirodi bolesti, visini potrebnih sredstava, hitnosti slučaja, kao i broju podnesenih zahtjeva.
- (2) Prioritet za odobravanje sredstava imaju slučajevi iz člana 22. ove Odluke i slučajevi teških oboljenja kao što je akutna tuberkuloza, maligna oboljenja, endemska nefropatija, hirurške intervencije na srcu i mozgu, sve vrste degenerativnih oboljenja centralnog nervnog sistema, infarkt (srčani i moždani), oboljenja mišićnog sistema, paralize i druga teška oboljenja.
- (3) Na osnovu prijedloga Komisije, o dodjeli sredstava po podnesenim zahtjevima u pojedinačnim iznosima koji ne prelaze iznos od 2.000,00 KM odlučuje ministar Ministarstva, koji istovremeno utvrđuje dinamiku isplate.

- (4) Na obrazloženi prijedlog ministra Ministarstva, zaključak o dodjeli sredstava u iznosu većem od 2.000,00 KM donosi Vlada Kantona.

- (5) Pomoć za liječenje i kupovinu lijekova u izuzetnim slučajevima može se osigurati i na drugi način, kroz izravnu nabavku odgovarajućih lijekova ili plaćanje zdravstvenih usluga.

Član 32.

(Izdavanje rješenja)

- (1) Na osnovu dostavljene obavijesti Ministarstva o odobravanju pomoći, općinska služba donosi rješenje.
- (2) O žalbi na rješenje iz stava (1) ovog člana rješava Ministarstvo.

Član 33.

(Dostava i pravdanje sredstava)

- (1) Općinska služba obavještava lica kojima su doznačena odobrena sredstva i istim vrši isplatu putem tekućih računa.
- (2) Općinska služba je dužna u roku od 15 dana po realizaciji pomoći dostaviti Ministarstvu pravdanje utrošenih sredstava.

DIO TREĆI - ZAVRŠNE ODREDBE

Član 34.

(Sredstva za ostvarivanje prava)

Sredstva za ostvarivanje prava utvrđenih ovom Odlukom osiguravaju se u Budžetu Kantona.

Član 35.

(Evidencija)

Elektronsku evidenciju o podnesenim zahtjevima i korisnicima prava po ovoj Odluci vode općinske službe i Ministarstvo, po obrascima koje propisuje ministar Ministarstva, u roku od osam dana od dana stupanja na snagu ove Odluke.

Član 36.

(Instrukcije i nadzor)

- (1) U realizaciji ove Odluke, ministar Ministarstva može donijeti odgovarajuće instrukcije.
- (2) Nadzor nad provođenjem ove Odluke ima Ministarstvo.

Član 37.

(Ravnopravnost spolova)

Sve imenice koje se odnose na braniocce i članove njihovih porodica, upotrijebljene u ovoj Odluci samo u muškom ili samo u ženskom rodu, odnose se na oba spola.

Član 38.

(Stavljanje Odluke van snage)

Danom stupanja na snagu ove Odluke prestaje važiti Odluka o proširenom obimu prava iz zdravstvene zaštite za braniocce i članove njihovih porodica ("Službene novine Zeničko-dobojskog kantona" broj: 3/08 i 7/13).

Član 39.

(Ranije započeti postupci)

Svi slučajevi odnosno postupci koji do dana stupanja na snagu ove Odluke nisu pravosnažno okončani, završit će se po odredbama propisa koji je bio na snazi u vrijeme podnošenja zahtjeva.

Član 40.

(Stupanje na snagu i objavljivanje Odluke)

Odluka stupa na snagu osmog dana od dana objavljivanja u "Službenim novinama Zeničko-dobojskog kantona."

Broj: 01-37-11293/15
Datum, 20.05.2015. godine
Zenica

PREDSJEDAVALA
Draženka Subašić, s.r.

V L A D A

136.

Na osnovu člana 16. stav 1. Zakona o Vladi Zeničko-dobojskog kantona ("Službene novine Zeničko-dobojskog kantona", broj 7/10), na prijedlog Ministarstva za pravosuđe i upravu, Vlada Zeničko-dobojskog kantona na 14. sjednici održanoj dana 11.06.2015 godine, d o n o s i

U R E D B U**o izmjeni Uredbe o naknadama i drugim materijalnim pravima koja nemaju karakter plaće**

Član 1.

(Stavljanje van snaga izmjena i dopuna Uredbe)

U Uredbi o naknadama i drugim materijalnim pravima koja nemaju karakter plaće („Službene novine Zeničko-dobojskog kantona“,

broj: 8/09, 14/13, 2/14, 6/14,
broj: 02-02-2340/14 od 12.02.2014. godine,
broj: 02-02-13135/14 od 10.07.2014. godine,
broj: 02-02-16871/14 od 28.08.2014. godine,
broj: 02-02-19014/14 od 25.09.2014. godine,
broj: 02-02-21657/14 od 29.10.2014. godine,
broj: 02-02-24028/14 od 04.12.2014. godine,
broj: 02-02-1107/15 od 15.01.2015. godine,
broj: 02-02-2698/15 od 04.02.2015. godine,
broj: 02-02-3870/15 od 17.02.2015. godine i
broj: 02-02-7623/15 od 02.04.2015. godine),

stavljaju se van snage slijedeće Izmjene i dopune Uredbe: („Službene novine Zeničko-dobojskog kantona“, broj: 14/13, 2/14, 6/14,
broj: 02-02-2340/14 od 12.02.2014. godine,
broj: 02-02-13135/14 od 10.07.2014. godine,
broj: 02-02-16871/14 od 28.08.2014. godine,
broj: 02-02-19014/14 od 25.09.2014. godine,
broj: 02-02-21657/14 od 29.10.2014. godine,
broj: 02-02-24028/14 od 04.12.2014. godine,
broj: 02-02-1107/15 od 15.01.2015. godine,
broj: 02-02-2698/15 od 04.02.2015. godine,
broj: 02-02-3870/15 od 17.02.2015. godine i
broj: 02-02-7623/15 od 02.04.2015. godine).

Član 2.

(Stupanje na snagu)

Uredba stupa na snagu danom donošenja i objavljuje se u „Službenim novinama Zeničko-dobojskog kantona“.

Broj: 02-02-12853/15.
Datum, 11.06.2015. godine
Zenica

PREMIJER**Miralem Galijašević, s.r.**

137.

Na osnovu člana 16. stav 4. Zakona o Vladi Zeničko-dobojskog kantona - Prečišćeni tekst („Službene novine Zeničko-dobojskog kantona“, broj: 7/10), člana 119. Zakona o zdravstvenoj zaštiti („Službene novine Federacije Bosne i Hercegovine“, broj: 46/10) i Budžeta Zeničko-dobojskog kantona za 2015. godinu („Službene novine Zeničko-dobojskog kantona“, broj: 02/15), na prijedlog Ministarstva zdravstva, Vlada Zeničko-dobojskog kantona na 8. sjednici, održanoj dana 29.04.2015. godine, d o n o s i

(3) Prijava se podnosi u zatvorenoj koverti, na kojoj se obavezno mora naznačiti ko podnosi prijedlog za dodjelu javnog priznanja, kao i činjenicu da se podnosi Vladi Zeničko-dobojskog kantona i Odboru za javna priznanja“.

Član 4.

(Stupanje na snagu i objavljivanje)

Ovaj Zakon stupa na snagu osmog dana od dana objavljivanja u „Službenim novinama Zeničko-dobojskog kantona“.

Broj: 01-02-13132/21

Datum, 29.09.2021. godine
Zenica

PREDSJEDAVALAČICA

Ćazim Huskić, s.r.

438.

Na osnovu člana 37. stav 1. tačka f) Ustava Zeničko-dobojskog kantona i člana 6. stav (2) Zakona o dopunskim pravima branilaca i članova njihovih porodica („Službene novine Zeničko-dobojskog kantona“, broj: 1/14), Skupština Zeničko-dobojskog kantona na 38. sjednici, održanoj dana 29.09.2021. godine, donosi

ODLUKU

O IZMJENAMA I DOPUNAMA ODLUKE O PROŠIRENOM OBIMU PRAVA IZ OBLASTI ZDRAVSTVENE ZAŠTITE ZA BRANIOCE I ČLANOVE NJIHOVIH PORODICA

Član 1.

(Izmjena i dopuna člana 2.)

(1) U Odluci o proširenom obimu prava iz oblasti zdravstvene zaštite za branioce i članove njihovih porodica („Službene novine Zeničko-dobojskog kantona“, broj: 4/15, u daljem tekstu: Odluka), u članu 2. stav (1) tačka d) riječi „neposredno po punoljetstvu-prava iz člana 7. tačke b) i c)“ zamjenjuju se riječima „šest mjeseci po punoljetstvu-prava iz člana 7. tačka c)“.

(2) U stavu (2) iza riječi „u kontinuitetu“ dodaju se riječi „do dana podnošenja zahtjeva“.

Član 2.

(Izmjena i dopune člana 4.)

(1) U članu 4. stav (1) tačka c), tačka d) i tačka e) iza riječi „najmanje dvije godine“ dodaju se riječi „u periodu propisanom u članu 2. stav (1) tačka d) ove Odluke“.

(2) U tački d) riječi „pod uvjetom da nema druge prihode“ brišu se.

Član 3.

(Dopuna člana 7.)

U članu 7. tačka b) iza riječi „opravku“ dodaju se riječi „za ratne vojne invalide“.

Član 4.

(Izmjena i dopuna člana 9.)

(1) U članu 9. stav (2) tačka c) riječi „uvjerenje o nezaposlenosti sa navedenim razlozima zbog kojih lice nije osigurano po tom osnovu“ zamjenjuju se riječima „uvjerenje Zavoda zdravstvenog osiguranja Zeničko-dobojskog kantona o statusu osiguranika“.

(2) U tački d) iza riječi „legitimacije“ dodaju se riječi „-ovjerene kopije prve, druge stranice i stranice sa posljednjom ovjerom kod nadležnog organa“.

Član 5.

(Izmjena i dopuna člana 13.)

(1) U članu 13. riječi „Lica iz člana 2. i 4. ove Odluke,“ zamjenjuju se riječima „Ratni vojni invalidi“.

(2) Iza tačke c) dodaje se nova tačka d) koja glasi:

(3) „d) sufinansiranje dogradnje proteza donjeg i gornjeg ekstremiteta i očnih proteza kad to nije medicinski nužno, u vrijeme završetka ortopedskog pomagala, u iznosu koji se utvrđuje odlukom Ministra za svaku budžetsku godinu, a koji ne može biti manji od 30% cijene koštanja ortopedskog pomagala utvrđene aktima Zavoda zdravstvenog osiguranja Zeničko-dobojskog kantona, ukoliko Zavod ne pokriva punu cijenu koštanja nabavljenog pomagala“.

Član 6.

(Izmjene i dopuna člana 15.)

(1) U članu 15. stav (1) tačka b) brišu se.

(2) Tačka c) mijenja se i glasi:

„uvjerenje o kretanju (kao dokaz o prebivalištu);“

(3) Tačka f) mijenja se i glasi:

„originalni predračun, odnosno račun (original račun je obavezan u slučaju odobravanja sredstava za nabavku ortopedskog pomagala u skladu sa članom 13. tačka d) Odluke) koštanja nabavke ortopedskog i drugog pomagala“.

(4) U stavu (2) iza riječi „predračun“ dodaje se riječ „račun“.

(5) Dosadašnje tačke c) do f) postaju tačke b) do e).

439.

Član 7.**(Dopuna člana 23.)**

U članu 23. iza riječi „porodica“ dodaju se riječi „(supružnici i njihova djeca)“.

Član 8.**(Izmjene člana 26.)**

(1) U članu 26. stav (1) tačka b) briše se.

(2) U tački d) riječi „uvjerenje JU Službe za zapošljavanje Zeničko-dobojskog kantona o nezaposlenosti podnosioca zahtjeva i članova njegovog domaćinstva“ zamjenjuju se riječima „a za nezaposlene članove domaćinstva uvjerenje nadležne Poreske ispostave o statusu osiguranika odnosno da se isti ne vodi u jedinstvenom sistemu uplate doprinosa“.

(3) Dosadašnje tačke c) do j) postaju tačke b) do i).

Član 9.**(Izmjena člana 27.)**

U članu 27. tačka b) riječi „izuzev za slučajeve iz člana 22. ove Odluke“ zamjenjuju se riječima „izuzev za slučajeve za koje Komisija imenovana u skladu sa članom 30. stav 2. ove Odluke, ocijeni opravdanost zahtjeva“.

Član 10.**(Izmjena u svim članovima)**

U cijelom tekstu Odluke riječi „općina“ u određenom padežu zamjenjuju se riječima „grad/općina“ u odgovarajućem padežu.

Član 11.**(Stupanje na snagu i objavljivanje Odluke)**

Ova Odluka stupa na snagu osmog dana od dana objave u „Službenim novinama Zeničko-dobojskog kantona“.

Broj: 01-33-13133/21
Datum, 29.09.2021. godine
Zenica

PREDSJEDAVAJUĆI**Ćazim Huskić, s.r.**

.....

Na osnovu člana 14. stav 1. i 2. Zakona o Agenciji za privatizaciju Zeničko-dobojskog kantona („Službene novine Zeničko-dobojskog kantona“, broj: 4/97, 15/97, 6/01, 8/10 i 15/17), Skupština Zeničko-dobojskog kantona na 38. sjednici, održanoj dana 29.09.2021. godine, donosi

ODLUKU

o izmjeni Odluke o imenovanju predsjednika i dva člana Nadzornog odbora Agencije za privatizaciju Zeničko-dobojskog kantona

Član 1.

(Izmjena sastava Nadzornog odbora Agencije za privatizaciju Zeničko-dobojskog kantona)

U Odluci o imenovanju predsjednika i dva člana Nadzornog odbora Agencije za privatizaciju Zeničko-dobojskog kantona („Službene novine Zeničko-dobojskog kantona“, broj: 15/19), u članu 1. tačka 1. riječi „Mesud Čamdžić“ zamjenjuju se riječima: „**Harisa Herceg**“.

Član 2.

(Mandat novog predsjednika Nadzornog odbora Agencije za privatizaciju Zeničko-dobojskog kantona)

Imenovanje iz prethodnog člana ove Odluke vrši se do isteka mandata postojećeg Nadzornog odbora Agencije za privatizaciju Zeničko-dobojskog kantona, koji traje do **22.09.2023. godine**.

Član 3.**(Stupanje na snagu i objavljivanje)**

Odluka stupa na snagu danom donošenja i ista će se objaviti u „Službenim novinama Zeničko-dobojskog kantona“.

Broj: 01-30-13134/21
Datum, 29.09.2021. godine
Zenica

PREDSJEDAVAJUĆI**Ćazim Huskić, s.r.**

.....